

寧波府志卷之二十一

寧波府知府富平曹秉仁纂修

慈谿人物

三國闕澤

字德潤家世耕農至澤獨自力於學貧無貲嘗為人傭書以供筆札寫畢誦讀隨遍精思

講論至忘日夜由是顯名察孝廉除錢塘長遷柳令孫權辟補西曹掾權稱尊號以為尚書後改中書令加侍中赤烏五年拜太子太傅以勞封都鄉侯澤性謙恭篤慎官府小吏皆與抗禮口未嘗齒人之過然朝政有所缺失無不隨事匡救權嘗問書傳孰美澤舉賈誼過秦論以寓諷諭呂壹奸罪發有司以大辟論或以為宜加焚裂澤曰盛明之世豈宜有此諸司欲增重科防澤每以禮律諍之其和而守正皆此類也澤於羣籍無不博覽尤精禮儀及天文之學嘗以經傳文多難盡用因斟酌諸家刊約禮文及註諸說

寧波府誌

卷之三

人物

以授二官又著見賓儀乾象歷註等書並行於時每朝議經典有疑輒就澤咨訪其容貌如不足而答問瀾翻不窮虞翻嘗稱之曰闕生矯傑蜀之揚雄又曰闕子儒術今之仲舒其為當時推重如此按三國志澤山陰人而其遺蹟皆在今慈谿地相傳晉濟寺即其故居寺後山名闕峰寺門湖名闕又名德潤則澤之為慈人無疑矣

虞翻

字仲翔少好學有高氣太守王朗命為功曹孫策

護至東部侯官朗謂翻曰君有老母可以還矣翻歸策復命為功曹待以交友策好馳騁游獵翻諫不納出為富春長策薨長吏欲赴喪翻恐鄰縣山民有變因留制服諸縣効之民賴以安曹操為司空辟翻拒不受翻與少府孔融書示以易注融答云聞延陵之禮樂觀吾子之治易乃知東南之美非徒會稽之竹箭又觀象雲物察應寒溫原其禍福與神合契可謂探賾窮通者矣孫權時為騎都尉數犯顏強諫權不

說又性不諧俗多見謗毀坐徙丹陽涇縣呂蒙圖荆  
州請翻自隨料敵多奇中權為吳王宴羣臣殿上自  
起行酒翻佯醉伏地不肯持權怒欲手刃之大司農  
劉基抱權諫得免翻性疎直又數有酒失權嘗與張  
昭論神仙翻曰彼皆死人而論神仙世豈有仙人耶  
權積不能堪遂徙翻交州講學不倦門徒嘗數百人  
又為論語老子國語訓註傳於世翻於經籍無不窮  
討尤精於易嘗奏上其易注曰自漢初以來海內解  
易幸少孝靈之際頽川荀譚號為知易而所解西南  
得朋東北喪朋之說顛倒反逆南郡太守馬融名有  
俊才解釋復不及譚若乃北海鄭康成南陽宋忠所  
註皆未得其門難以示世孔子曰可與共學未可與  
適道豈不其然又改正鄭康成解尚書違失及註五  
經違義尤甚者一百六十七事嘗云自恨骨體不媚  
獲罪犯上當長沒海隅以青蠅為弔客使天下得一  
人知己足以不恨其自信如此在南十餘年年七十  
卒翻十一子第四子汜最知名孫緜迎立瑯琊王休  
未至將入官圖不軌百官皆失色汜獨極諫緜不得

寧波府誌

卷之三

人物

二

已卒立休後為散騎常侍以討扶嚴  
功拜交州刺史冠軍將軍封餘姚侯

晉虞喜

字仲寧少有操行博學好古諸葛恢臨郡屈為  
功曹察孝廉州舉秀才司徒辟皆不就元帝鎮

江左疏薦喜公車徵拜博士復辭司空賀循先達貴  
顯重喜學行每詣喜流連信宿恒至忘歸自云不能  
測其所際也太寧中與任旭俱徵詔曰夫興化致政  
莫尚乎崇道教明退素也遷播以來儒雅凌遲每覽  
子衿之詩未嘗不慨然臨海任旭會稽虞喜並潔靜  
其操歲寒不移研精墳典居今行古志操足以勵俗  
博學足以明道其更以博士徵喜辭疾不赴咸和未  
詔舉賢良方正直言之士太常華恒以喜應詔咸康  
初內史何充復上疏云伏見前賢良虞喜天挺素貞  
高尚邈世束修立德皓首不倦加以旁綜廣深博學  
廣識研微有弗及之功味道無風塵之志高枕柴門  
怡然自足宜使蒲輪紆衡以旌殊操招徵為散騎常  
侍又不起喜前後辭辟命者凡七幣聘稠疊有司敦  
促上道喜當之泊如也視時事若無與者然國家有

大典禮多就喜諮訪永和初有司奏十月殷祭京兆府君當祧征西豫章潁川三府君當毀內外集議不能決特使就喜決焉喜專心經傳旁及讖緯諸書嘗著安天論以難渾蓋又釋毛詩畧注孝經爲志林三十篇凡數十萬言行於世

虞預

字叔寧喜之弟少孤好學有文太守庾琛命爲主簿上計陳時政闕失其畧曰軍寇以來賦役煩數

百姓年荒失業而長吏輕多去來送故迎新交錯道路受者恐車馬之不多送者恨吏卒之常少窮奢竭費謂之忠省煩從簡謂之薄轉相仿倣流而不反加以道途阻梗送者經年夫一夫不耕必有受其饑者况送者恒以百數平宜勒屬縣凡令尉去官人船吏侍皆依法減省琛善其議即時施行轉功曹史察孝廉不行諸葛恢庾亮交薦名爲丞相行參軍兼記室除佐著作郎太興二年大旱求言預以爲爲國在於得才得才在於抽引可用者不當拘疎賤不可用者不當泥親貴疏陳用人之法言極剴切時寇賊未殄

寧波府誌

卷之三

人物

三

牧守多降盜異類周撫陳川徐龕等相繼背叛放兵四掠預復陳防患之要在得將將不素簡難以應敵壽春無鎮祖逖孤立前有勅敵後無係援宜博舉將才必當其任獎勵寵待使奮不顧身此漢高所以馭英布之術也轉瑯琊國常侍遷秘書丞咸和初復旱詔羣臣陳得失預復疏言比者刑獄繁多有力者廣牽遠引以稽歲月無援者嚴其夏楚期於入重百姓嗷愁感傷和氣請自今以往宜輕罪速決殊死加請仍嚴飭朝臣各崇節儉毋仍前醉酒沉湎傷財敗俗格天弭災實在於是預先後三疏皆切中時弊發言梗直有人所不敢言者文多不能悉載故撮其大畧如此從平王含賜爵西鄉侯蘇峻之亂太守王舒請爲諮議參軍峻平進平康縣侯遷散騎侍郎常侍領著作如故預雅好經史憎疾虛無常論阮籍裸袒之害比之伊川被髮時以爲名言所著會稽典錄二十篇諸虞傳十二篇詩賦碑詠等復數十篇

陳虞荔

字山披幼聰敏有志操九歲時隨從伯闡侯太常陸倕倕問五經十事荔對無遺者又嘗詣徵

士何孕值太守衡陽王造焉何言於王欲見荔荔以  
未有板刺辭王嘉其高尚還郡即以主簿辟荔荔方年  
少不之就也及長博覽善文釋褐梁西中郎行參軍  
尋署法曹外兵參軍梁武帝置士林館荔製碑上之  
帝命勒文館中仍用爲士林學士侯景之亂荔率親  
屬入臺臺城陷遜歸陳高祖代梁以荔棲遲東土無  
仕宦情遺書勸其至都文帝復書促之荔不得已應  
命除太子中庶子領大著作東揚州揚州大中正文  
帝素重荔常引置左右朝夕顧訪荔沉密少言所獻  
替人莫能窺也生平淡於仕宦視權勢若無與者惟  
於孝友天性至篤在梁時以散騎常侍兼中書舍人  
參與機軸入陳任過尤隆荔始終端退以文史自娛  
而已喪母時值臺城之難情事未伸布衣蔬食不聽  
音樂者終其身弟寄寓閩中依陳寶應每語及輒流  
涕文帝爲之哀感曰我亦有弟在遠此情甚切他人  
豈知因勅寶應求寄終不遣荔遂成疾帝命將家口  
入省數枉車駕臨視中使手勅相望於道復給以魚  
肉令之強食然荔每一念及氣結填胸帝雖恨其固

寧波府誌

卷之三十一

人物

四

執而亦不忍強也天嘉二年卒贈侍中  
謚曰德子喪還帝臨送之子世基世南

虞寄

字次安少聰敏客有造其父者遇寄嘲之曰郎子  
姓虞必當無智寄應聲曰文字不辨豈得非愚客

漸謂其父曰此子非常文舉之對不是過也及長好  
學善文冲靜有棲遁之志梁武欲名用之稱疾不赴  
岳陽王守會稽引參軍事領郡五官掾寄簡畧不事  
苛細閉閣終日以書籍自娛而七侯景之亂隨兄荔  
入臺城陷遁還張彪往臨川强寄偕行寄與彪將鄭  
瑋同舟劫寄奔於晉安時陳寶應據閩中得寄甚喜  
陳高祖平侯景寄勸寶應自結從之承聖元年除寄  
和戎將軍中書侍郎寶應托以道阻不遣已寶應結  
婚畱異有逆謀寄每陳禍福順逆拆之寶應嘗令左  
右讀漢書至蒯通說韓信曰相君之背貴不可言蹶  
然起曰可謂智士矣寄正色曰覆酈矯韓不可謂智  
豈若班彪王命論之識所歸也寄知不可諫乃爲居  
士服居僧寺稱脚疾不可起寶應遣人燒寄臥室縱  
火者旋自救之及畱異起兵寶應潛資其部曲寄乃

致書極陳不可者十事云為將軍計莫若絕婚雷氏  
遣質入朝釋甲偃兵一遵詔旨鐵券之要白馬之盟  
載在宗祊王言無食且成敗禍福間不容髮消患未  
形是稱智者如必欲妄奮螳臂弄兵潢池則寄為老  
詩為狂言寄固早拚一死矣魯仲連一介男子猶義  
不帝秦蹈身東海况寄累世儒紳家傳忠孝羈孤梗  
絕遙望闕廷神魂飛越寧與臧洪同日死決不忍見  
將軍受逆命之誅而與隸彭共菹醢也寶應覽書大  
怒或謂虞公病勢漸篤言多錯謬意小釋及寶應敗  
走頤謂其子扞秦曰早從虞公言不至今日但涕泣  
而已寶應既誅文帝勅都督章昭達禮遣至都還朝  
即日引見曰管寧無恙慰勞再三衡陽王出閣置府  
僚帝屬到仲舉求宿士有行業者仲舉未知所對帝  
曰吾自得之矣手勅用寄曰所以屈卿遊藩者欲以  
師表相事也尋兼散騎常侍累除國子博士東揚州  
別駕揚州治中尚書左丞東中郎建安王諮議戎昭  
將軍前後凡六命皆稱疾不就特命陪列有疑議就  
決之朔望修牋而已太建八年加太中大夫卒寄少

寧波府誌

卷之五

人物

五

篤行造次必於仁厚雖僮豎未嘗加以聲色至臨危  
執節辭氣凜然則蹈白刃弗顧也流寓南土與兄荔  
隔絕因感氣病每得書氣輒奔劇居官未嘗秩滿數  
月即求解退及謝病里門諸王為州將必造門致禮  
常出遊僧寺閭里傳相告語羅拜道左或言誓為約  
者指寄便不欺其至行感人如此寄無子以兄子世  
南為後

唐虞世南

字伯施蕩之子為叔寄後沈靜寡欲與兄世

基同學於顧野王精思不懈至忘盥櫛嘗慕  
僕射徐陵之文章陵以為已作弗是過也由是顯名  
陳天嘉中為建安王法曹參軍入隋至校書郎煬帝  
疾其峭直弗用唐太宗為秦王時滅竇建德引為府  
參軍累遷太子中舍人即位拜散騎侍郎弘文館學  
士以老乞骸骨遷太子右庶子改秘書監封永興縣  
子進公貞觀十二年致仕授銀青光祿大夫卒贈禮  
部尚書諡文懿陪葬昭陵世南容貌儒謹外若不勝  
衣而議論持正遇事敢言剛直之性老而彌篤貞觀

中隴右山崩蛇見山東江淮大水太宗訪焉世南歷引伯宗對晉侯及漢文帝晉惠帝災異事以對以爲惟修德可弭災淫雨大水恐有冤獄枉繫上于天和宜省囚徒挺訟獄以當天意帝善其言遂遣使賑饑省獄多所原赦其後復有星孛於虛危歷氏百餘日世南復引晏嬰對景公事戒帝功高自矜治久生驕帝爲矍然曰秦皇剗除六國煬帝富有四海皆以驕敗吾敢不爲卿戒耶高祖崩詔山陵準漢長陵故事厚送終禮工役迫促程督苛暴世南上疏切諫其畧曰古聖王所以薄葬者非不欲厚送其親以爲高墳大隴寶玩珍貝皆所以累之也漢文帝感張釋之之言卒從薄葬魏文帝預爲終制明器用瓦不藏金銀銅鐵若二君者可謂深思遠慮爲長久計者矣其餘人主生前驕於富貴之逸欲死後又聚歛珍寶埋藏地下及陵谷變遷陵寢無不發者往往燒取珠襦玉匣骸骨與金玉同盡夫厚葬本以爲顯榮光大之具而令其灰燼地下豈不痛哉今以陛下之聖而俯與秦漢諸君同其侈泰臣切痛之臣愚以爲宜依周制

寧波府誌

卷之三

人物

六

爲三仞之墳明器不用金銀銅鐵刻石陵左明示後世書奏未報復上疏爭之時議者多言宜遵遺詔以世南諫遂抑損焉生平篤於孝友父歿毀不勝喪叔寄陷陳寶應衣布飯蔬者餘十年宇文化及弑煬帝并殺世基抱持號泣請代不得哀毀至於骨立文章婉縟博瞻與世基齊名時比之二陸書法得於浮屠承師盡究其秘太宗命寫列女傳屏風於時無本世南暗疏之無一字謬太宗稱爲行秘書又稱其五絕曰德行忠直博學文詞書翰然世南實於忠直尤篤所言無不罄盡嘗被命和御製宮體詩世南曰體非雅正上有好下必有甚恐天下自此風靡矣太宗好獵世南亦時以爲言卒後太宗手詔魏王泰曰世南與我一體拾遺補闕何日無之今其云亡石渠東觀中無人矣一日作詩送興亡歎曰鍾子期死伯牙不復鼓琴朕將何示耶勅褚遂良就靈座焚之後夢獲謹言如平生制卹其家

虞九臯

字鳴鶴父當與柳宗元父鎮同為郭子儀記室及鎮為岳鄂都團練判官當復刺沔州兩家子弟幼相友善九臯以文行稱貞元中舉進士遷卒於長安一時名流丐宗元為誄稱其傳襲儒風彪炳文史克恭以孝惟禮是履相與謚曰恭甫其後遂名其鄉為鳴鶴者以九臯字故也按虞氏史載餘姚人而其居今在慈谿北鄉觀鳴鶴鄉之由九臯得名則其世為慈人無疑矣

宋姚萼

字舜徒以字行幼開爽穎悟學如夙植登熙寧九年進士第歷尉掾為桃源宰訊民疾苦而振

雪之郡將怙威凌僚吏屬邑患苦萼毅然爭論郡將為之少戢鄰郡有訴不平必丐於部使者愿付萼決之捐貲修孔子廟督課諸士翕然向方鄉有虎萼以文禱諸社越三日虎仆祠旁奏績為天下第一除提舉成都府路常平等事陸辭神宗諭以卿任桃源有愛民之心萼退謁丞相論蜀道利疚乞以義倉之儲置吏立法收養鰥寡老幼死給衣裳官為殮葬歲薦饑間有遺兒請雇媪乳之丞相為奏行焉丁艱未赴

寧波府誌

卷之三

人物

七

服除改湖南神宗復諭以居養安濟漏澤為朕施實德於民卿向有言故復命卿後由江東副曹除直龍圖閣知夔州興學勸農有古循吏風卒之日夔民罷市聚哭計聞桃源民乃即萼生祠爭出貲聚僧道薦奠焉

翁升

字南仲力學有志少從安定胡瑗受易入太學登元豐五年進士第出仕洛守官篤濟以廉謹當路

才之元符中上書言事切中時病用事者方主黨禁錮賢士大夫籍升於初等自是沈於選調建炎初黨禁解將召用之而山林之志已不可奪升自奉簡薄勇於急人睦親郵孤平糶賑乏鄉人敬之諱升斗之升日方斗云按宋史及元祐碑刻並無翁升而傳云籍升初等謬甚又升是何官職傳亦不載明無從考證姑仍其舊

王庭秀

字穎彥與黃庭堅楊時游為學不苟趨時好造詣深遠操持堅正發為文詞俊邁宏逸登政和

二年上舍第歷官州縣侍御史李光薦為御史臺檢  
法官宣和靖康時進言皆發於忠義拜監察御史奏  
乞威斷當出於人主而所遣宣諭官當令舉廉吏又  
言刑名有疑慮者令州郡法官申憲司閱實具奏以  
取裁決遷殿中侍御史論黃潛善賣官售寵罷之既  
與鄭穀力爭降封高宗事復論呂頤浩奏捷不當出  
知瑞州右正言呂祉奏朝廷緣論大臣今日移一言  
官明日罷一言官則後日大臣有失誰敢言者遂名  
為吏部郎改左司言朝廷比來深嫉貪吏然州縣之  
間豈無廉介自將沉於下僚者宜命五使所至以廉  
潔清修可以師表吏民者以名來上參之公議不次  
陞擢以勵士風從之遷檢正中書門下省諸房公事  
與宰相議多不合引疾求去詔直秘閣主管崇道觀  
而歸子璧字子潤宣和六年進士年少氣銳以遠大  
自期時方復博學宏詞科首冠  
其選終於待次通判上論惜之

羅仲舒

字宗之以春秋登淳熙十四年進士授安慶教  
授調常德學政修舉陞宣教郎知宜興縣遷太

寧波府誌

卷之五

人物

八

學博士陞對稱旨遷秘書郎時寶玉來歸議舉慶典  
仲舒言三邊未靖不宜重費累遷至福建提舉常平  
茶鹽會大水編筏救溺以萬計仍發粟賑之改提點  
江東獄黠吏獻議於饒守更鬻鹽法而官顧其利舟  
運不通民數月不得鹽仲舒責吏曰奪民而絕其利  
者汝罪也笞而流之饒人為之語曰前葛後羅一臺  
二妙葛謂參知政事邨也其先壠在鄞東湖史彌遠  
欲得之以書諷焉仲舒答曰官可削臂可斷祖宗之  
墓不可移也彌遠卒不能迫詔為國子司業上  
章告老紹定初拜宗正少卿以直顯謨閣致仕

桂萬榮

字夢協慶元二年進士授餘干尉邑多豪右萬  
榮一以紀律繩之馭民則用慈愛子弟獲訓迪

者耻為不善秩滿民乞雷調建康司理參軍鄉相史  
彌遠欲招致之萬榮以分定固辭差主管戶部架閣  
除大學正輪對奏絕敵選將二事除武學博士改宗  
學出判平江府時守朱在政尚嚴刻以鹽課拘繫甚  
衆萬榮具書告在不從挾行牀與所拘人同寢在愧  
即縱遣焉陞守南康檢吏奸省浮費征稅有法民蒙



其利累官直秘閣遷尚書右郎除直寶章閣奉祠歸萬榮嘗問道楊簡簡告以心之精神是謂聖遂築石坡書院讀書其中從子錫孫通春秋十歲試童子科號為神童登紹定五年進士歷官御史兼崇政說書忤旨尋以集英殿修撰召不起四世孫仝德謹厚敦樸淹貫經史嘗教授郡庠諄諄以忠孝大節為先聞者多所成就

劉厚南

字子固嘉定五年進士授瑞安尉邑瀕海多盜於奉職奏之累階進秩皆有能聲以國子博士名館下喜得師會日食詔求直言上疏有云陛下自登大寶今將二紀凡懼災罪已導人使諫不知幾詔叩關投匭應詔來諫不知幾疏求言於今日人未必不指為玩獻言於今日人未必不視為常惟因言以見於用尊聞以行所知斯為得之言極愷切帝加獎諭遷著作郎轉朝散大夫知台州轉朝請大夫致仕

寧波府誌

卷之三十一

人物

九

程士龍

字應辰嘉定四年進士主句容簿歲饑督濟有方老弱賴以全活校文於歙真德秀重其才薦知仙居李宗勉復薦之遷知臨江軍多善政除國子監丞輪對明爽遷右曹郎改知撫州謹刑惠民城中有夜半殺人者逮繫至六七囚獄成士龍疑之俾臨川宰察其實得殺人者捕之一訊而服民作平冤歌頌之歷官禮部侍郎奉仙都祠壽八十卒於官

童居易

字行簡少穎悟知學從鄉先生李聳學古文又大奇之遂舍所學學焉登嘉定十六年進士鄭清之柄國舉補登仕郎朝議欲使諸路置買浮鹽司除擬已定居易詣執政歷陳利害命遂寢相國趙葵開閩淮東以居易攝天長簿時諸路屯兵每棗熟禁民採取民失其利居易上書乞弛其禁旁九郡皆獲免丙申冬元兵攻城急邑令與主將不協軍民疑阻居易力為陳解遂協力捍防城賴以全調諸暨簿惡少攻剽為姦尉莫能致居易以計悉擒之上績課最轉宜

義郎知邵武之泰寧移判夔州遷太學博士以身爲  
教學者仰之以言會子事忤上出判吉州未幾遷本  
州同知陞中奉大夫知廣東德慶府蠻獠雜居民悍  
難化居易撫以愷弟三載民樂耕桑門不夜闔獄囚  
屢空尋上章乞歸居杜洲之  
濱學者從之稱杜洲先生

姚獬孫

字應獬登孫從子寶祐元年進士補國子助教  
正身率下勤於啟迪館士叩其淵源者屢滿戶

外秩滿館士借留於銓部改學錄教學益著登孫前  
爲司業諸生稱爲東南遺老獬孫繼之人以爲世典  
成均善於其職獬孫博學清介爲文本家傳卒之日  
至鬻衣以葬按登孫傳稱宋季退隱元初始起助  
教而獬孫傳又謂登孫在宋爲國子司業又二人命  
名相同而以爲叔姪皆不可曉以無可考証姑仍之

方山京

字子高嘉定十年進士南安軍教授季仁之子  
季仁館於餘姚孫氏妻以女生山京旅泊母家  
幼孤固窮力學景定三年廷對第一或以策尾短簡  
令增之山京正色曰吾生平所學在無自欺今旣徹

寧波府記

卷之三十一

人物

十

上覽將誰欺乎授承事郎簽書平江軍節度判官時  
有星字於井山京衡文天府發爲策問極言內帑之  
私公田之擾比出院言者劾之遂歸杜門教子蕭然  
自適度宗登極徵用添差通判吉安州主管建昌軍  
仙都觀遇  
疾不起

劉揚祖

字弘宗景定三年登進士第除江州教授學政  
修舉遷崇文院校書郎賈似道執政揚祖挺然

無忌以言事忤旨黜監沅東酒稅臺官交薦之起授  
通直郎宰劍南之將樂建言時政利害賈不悅再黜  
之以例起撫州判官改守吉州福建提點刑獄遷刑  
部員外郎入朝益勵志節遇事敢言賈益惡之時同  
郡士以事坐廢者六十餘人揚祖與焉賈迫於公議  
尋復故職進禮部郎中值賈方崇臺榭求珍玩揚祖  
又特疏謂朝廷不當忘經國大猷坐待其弊賈又欲  
黜之會揚祖丁內艱歸逾年而宋亡元下詔求賢揚  
祖徙家雲湖寺之東原於西茅山建介白樓以爲隱  
居讀書之所時從弟莘亭主簿榮祖季子參知政事

道中俱未仕時與講解經傳  
墾田給食自號介白散人

明鍾勗

字士懋洪武四年郡庠禮聘訓導五年舉教授

儲材高估以病民勗預采山場藤木宿待需官民  
兩便焉次年颶風掀漲平地水深數尺鹽倉儲貯數  
百萬幾浸及之勗躬率民丁俾家出一囊盛土石築  
堤貨賴無恙復捐俸構講堂齋舍以教士坐事免歸  
十六年以明經舉授兵部侍郎率於  
官子景亦舉明經仕至戶部侍郎

柳敬中

洪武四年舉明經授登封教諭陞常熟知縣禮  
賢士墾田野有孔子裔流落在邑敬中曰此守

土責也為娶妻置產築室宣化門外又得范文正公  
裔孫復為築室贍養遣入庠序永樂初以憂去民詣  
闕保畱陞蘇州府同知敷政  
平易民甚宜之後祀於學宮

陳奐

字聚奎少孤銳意學問洪武二十五年以薦名對  
稱旨授扶溝令修舉廢墜除革奸蠹暇則入學與

軍波府誌

卷之三

人物

士

諸生講解經史親加改較尋調山西之屯留土壤瘠  
瘠民多流竄奐出公帑錢輸其逋租流民相率來歸  
以憂去服闋改都督府都事永樂初授上元令蘇州  
匠錢氏婦謀殺其夫詣縣告給門禁出其喪既去奐  
凭几寐夢男子訴被妻殺覺追之婦取白金釵賄使  
者奐鞠之具伏人驚以為神秩滿遷審理正再遷刑  
部主事仁宗即位奐奏事曰此非  
上元陳知縣乎即擢奐滕府長史

韓超

字彥啟以字行洪武二十七年薦授洧川令以循  
良稱都御史謫其誣誤廷論之父老詣闕奏請復

職永樂初尚書鄭賜鎮河南薦其才名入將大用邑  
民復詣闕留在洧川十三年民肖像立祠擢吏部員  
外郎陞廣西僉事操守清白慎刑恤獄至  
安隆長官司撫蠻中瘴卒所至立祠祀之

張海

字子深洪武二十七年貢生擢戶部主事尋改兵  
部遷郎中陞山東右叅政永樂初以呂梁至臨清

水道阨塞舟行不利命與平江伯陳懋穿渠堯關事  
竣賜賚復慮水泛衝嶺新岸未固請給馬蓮草子五

百斛種沿涯以固土  
力遷本省左布政使

陸中善

字中善洪武三十年歲貢建文初由國子生授  
刑科給事中永樂改元遷都給事成祖北巡留

皇太子監國以尚書蹇義金忠為詹事以中善為丞  
與侍講楊士奇共總青宮之政小心謹密夙夜匪懈  
嘗從祀南郊進謹身書數百言曰致謹於身須致謹  
於心承事乎天先承事乎我屏輦却飲遷坐變服身  
謹矣而心不誠則上帝不臨燔柴掃地絳儀肅將天  
事矣而我不德則昊天不享鬼神之享享於克誠黍  
稷之馨不如明德帝深納之晉少詹兼府丞賜祭服  
寶鈔命出祀皇陵見淮甸役重上疏乞均役從之太  
子嘗賜手書其畧曰卿日侍左右知無不言兩京庶  
務籌畫皆當且骨鯁天生不避忌諱余念不忘茲以  
已意私割陸忠文印一枚賜卿使人知君弼余於難  
顯榮於國且卿為皇上腹心毋過觸鱗庶成皇業其  
為儲皇眷注若此後以諫解縉事忤旨謫  
交阯邸烏令尋下獄已而釋之未幾卒

寧波府誌

卷之三

人物

十一

顧巽

字與權永樂十年進士授江西按察僉事公廉仁  
恕所至訪察幽隱民間銖兩之奸必燭人以青天

目之後遷山東叅議恪守清白終始不渝卒於官大  
理卿夏時正稱之曰俸無十金之積可方古之廉吏

茅維揚

名並基以字行資性峭深有智計登永樂十三  
年進士授行在廣西道御史楊士奇當國其姻

屬有犯法者維揚按如律改四川道臺中奏疏及諸  
道讞獄當否皆出其裁擇尋擢四川僉事轉河南副

使歷四川按察  
使所至有廉名

鄭惟桓

字公圭少孤鞠於祖母周日取古格言訓之惟  
桓感激奮勵舉永樂十二年鄉試第一次年與

諸父讓同登進士授監察御史風裁大著廣東陳憲  
使被誣入於法惟桓知其冤訊出之陳懷百金為報  
惟桓笑曰吾豈私若法當爾耳却之十九年奉天殿  
災蔬六事指陳時政得失言過剴切獲怒謫交阯南

靖州知  
州卒

馮芳

字德秀通五經工書善屬文與張楷葛阜友善以氣節相激勵永樂十五年舉於鄉謁選時以太后

命寫楞嚴經千卷擇貢士善書者任之事竣當與進士出身中選者三十人芳與焉上章自劾曰臣以佛

經授美官如名教何昧死辭上笑曰舉人與教職去遂授四川長壽訓導轉河南洛陽

年竟不得遷學者稱為長壽先生中辭不就乞改教職歷龍泉教諭青州教授澹泊自守訓士以禮晚致

任歸隱慈湖之濱號湖南居士其恬退畧相埒云

秦岳

字維翰中永樂十五年鄉試卒業太學授兵部主事歷刑部郎中宅心平恕不事嚴刑而犯者輒得

其情出為山西糧儲道參議時水旱相仍有司催督愈迫逋負愈積岳曰暑雨艱食民方怨咨急之倍價

以償是驅之溝壑耳為寬期三月鞭撲不施而積逋頓清以憂去服闋調廣東於官岳賦性寬厚無驕

矜伎刻之行嘗書忍耐勤謙和太字以自警有加以非禮者弗與較益厚遇之人皆稱其長厚云

寧波府誌

卷之三

人物

三

葉瓊

字彥英永樂二十一年舉人歷官至安慶郡守為政平恕惠澤及人有羅誣陷極刑瓊覆案適有

風霾之異嬰然曰得無冤乎竟白其無辜人咸頌之同時葉海字用深永樂十四年歲貢入太學授湘潭

令以治行稱用薦陞知平度州民素驕悍海繩以法首除犬猾鄭洪為蜚語所中繫刑部獄抱慙卒輿論

焉

陳葵

字朝陽父雷為人所誣謫戍淮北疏謁明太祖一見奇之即欲用為兵部尚書廷臣言其太峻姑試

以民事擢知仁和縣尋卒葵少孤鞠於母家舅氏余伯熊教以儒業遂與伯熊次第被徵授惠安知縣改

山東單縣兩地皆著能績永樂初陸詹事中善薦其才可大受遷知邳州凡九年利澤深厚民戴之若父

焉

周弘

字尚德好學敦行奉化韓御史朝京便道訪其兄紀善冕適縣有疑獄令偶決於弘數言剖析兩造

皆服韓心奇之遂以懷才抱德薦授柘城令在縣九載寬厚廉謹愛民如子一邑大治民為立生祠後吳江趙寬慕其人按柘城臨祠再拜曰生以名賢稱死以名賢祀若周公吾無間然矣

### 王鼎

字重之尚書來季弟也正統中以明經薦授本學訓導考績之京試霍光不學無術論擢第一拜監

察御史巡按山西有知縣郭某貪而善賂鼎頌行當道交口舉郭心異焉行部至縣郭倍道遠迎承奉周至愈疑之因摘發其奸一歲中凡罷貪汚吏六十人再按雲南陞江西按察僉事同邑祭酒陳敬宗於人少許可贈詩有無瑕美玉千金價徹底寒潭萬丈清之句以憂去起補廣東時流寇剽掠四境騷然鼎涉險阻觸瘴癘不避一日出巡為賊所得昇至寨時有二王僉事一為吳人貪而多藏賊誤喜以為可煤貨其中一人識之曰此浙江王僉事清官也不可犯輿送二十里拜謝而去賊既平鼎以年老乞歸都御史韓雍鎮廣知鼎廉出白金百兩為贖固辭不獲至中途因叅政張瓚反其物封識如故雍歎息久之其沒

## 寧波府誌

### 卷之三

人物

古

也學者私謚為清節先生子金成化十一年進士仕大理寺副善詞翰早世

### 姚堂

字彥容正統四年進士授工部虞衡主事歷陞郎中先是部以出納故藏奸隱穢為士論所鄙堂砥

礪名節曹署為之增重出知廣德府疑獄累年莫白者堂至立辨出之他政無不修舉巡按韓雍表其治行第一內艱去官服甫闕尚書姚夔知其賢即家起知蘇州府蘇多羨餘歲以億萬計悉貯公帑以備賑恤及修孔子廟先賢祠費豪勢人道蘇者往時多厚索堂下令驛廩之外不得加毫末會以事忤巡撫劉孜乃移守鎮江而以鎮守林鶚代之蘇民遮道泣留不得為脫其履懸部門治鎮一如治蘇政通惠洽流民復業者九千餘戶丹徒令賴正時宰王某甥也怙勢縱恣堂一裁以法賴始自戢堂亦坐是久不調刑部尚書陸瑜疏堂蓋鹽之守乃移廣東叅政以入賀過家卒仲子鉢成化七年舉人鉢子潛正德三年進士官南駕部郎內察前一日有傳姚郎中以墨糾者潛撫几歎曰吾祖以清白傳家今掛此議無以慰祖

宗地下矣遂掛簪刺喉而死及疏上乃同姓姚郎也蓋其遺澤猶足以廉頑立懦如此

劉煒

字有融正統四年進士授南刑科給事中副都周銓以私憾撻諸御史煒偕同官盧祥等劾之為銓

所許並違詔獄久之事白累遷戶科都給事景泰四年戶部以邊儲不足議令罷退官非贓罪者輸米二十石給之誥勅煒疏言此令若行則名器不重且考退之官多有罷軟酷虐荒溺酒色廉耻不立者非止賍罪已也賜之誥勅以何為辭若但褒其納米則是朝廷誥勅止直米二十石何以示天下後世帝立已之山東歲歉戶部以尚書沈翼習其地令往賑及至初無方畧煒因疏言其地已有尚書薛希連少卿張固鎮撫又有侍郎鄒幹都御史王竑賑濟而復益以翼所謂十羊九牧乞還翼專任希連等從之復勅平江侯陳豫鎮臨清違制罪豫被資讓明年都督黃瑛以易儲議得帝眷奏求霸州武清地煒抗章言黃瑛本蠻獠蒙重任怙寵妄干乞地六七十里豈盡無主者請正其罪帝遣主事謝景往勘果民產也然帝亦

寧波府誌

卷之三十一

人物

五

卒不罪玄天順初出為雲南叅政改廣東惠潮分守潮有巨寇招之不服會兵進勦得其魁誅之改守南韶會大軍征兩廣煒晝夜區畫觸瘴癘卒於官

周翔

字鶴然自歲貢入監中正統十三年進士授監察御史巡視應天擊貪汚屏豪右綽著風裁竣事報

命值英宗復辟擢守安慶陞辭宣詣文華殿再塵戒諭宴賚優渥在郡九載革弊布新感惠廉至著便民十二事後皆遵行不廢以足疾乞休百姓遮道泣留不得建祠祀之裔孫鎬嘉靖八年進士官刑部郎中亦以清介稱

鄭岑

字子高景泰五年進士授刑部主事為劉大夏所知委看詳諸司奏牘京民楊才妄取人財事覺亡

去時有業裁衣歐陽者俗呼為陽裁捕逮之考掠成獄岑知為府胥所陷即與平反愚民沈政雷泰坐法擬死岑察其枉釋之山守揚州擇諸生會講資政書院建上學以夜郡子弟天旱祖跣禱於羣望雨輒應

居憂服闋補永平復夷齊廟平東門險飭軍衛寢銀  
礦善政累累二郡歷任凡九載上考功課最懇乞歸  
老家宰尹旻高其節特  
晉階山東右叅政致仕

**陳鏐** 字良金景泰七年舉人知銅陵縣政尚寬厚愛民  
如子民亦愛之如父惟馭吏則執法不回清慎之

操始終如一引年歸囊橐蕭然以山水文籍自娛族  
人陳熙字任勛少孤母錢織襪教育艱苦備嘗登弘  
治三年進士知龍巖縣與學校勸農桑簡徭息訟期  
月化行攝漳平篆值永定南靖寇亂奉檄征之潛師  
間道獲其渠魁以

薦擢廣西道御史

**鄭重** 字本弘成化十一年進士授邳州知州以才調繁  
通州元載擢南刑部郎出與修實錄以艱歸服闋

擢知長沙府以剛直忤吉藩遷高州知府致任重性  
端嚴多問學知識深遠居官廉潔有惠政所至民立  
祠祀之在通  
州政聲尤著

寧波府誌

卷之三

人物

七

**周津** 字文濟成化二十年進士初任御史監龍江瓦屑  
二權務中貴百計啗之不可得巨璫蔣琮欲納交

治具蕭寺托同寮致之及門而覺即策馬返濯知九  
江御史周進隆以瑞州盜起刳制守合宜選強明廉  
幹者治之奏徙津津至啟都御史林俊宜用東漢聽  
盜相斬除罪法林從之盜果平通判甘文紹家僮殺

人嫁罪於津逮繫兩易寒暑自以身為正官無一語  
及文紹瑞民擊登聞鼓訟冤司馬劉大夏為之申奏  
還津原職逆瑾讐正人兩罰津輸米於邊瑞民爭先  
代輸後積俸鬻產償之在雲南治水患令鑿漢厰諸

塾復開于河以殺其勢  
遷廣東左布政致仕

**沈元** 字德元煥九世孫也成化二十年進士知南陵縣  
歲大稔民洵洵不保元發帑藏勸富民出粟賑之

全活甚眾擢監察御史時人黨縱橫元慷慨引義章  
楓山蔡介夫諸正人咸引以為重出按淮揚任賢能  
去奸猾人服其知大體陞湖廣僉事武昌故多大獄  
元閱案至夜分假寐輒起務得其情人目之為一路



臯陶出巡至長沙以勞瘁卒

王綸

字汝言成化二十年進士除工部主事遷禮部員外郎再遷郎中藩府支庶日蕃有假乞養子及女

子肩祿米者綸請查修玉牒限年受封歲省以百萬計播州宣慰楊愛妄言太祖時曾賜蟒玉乞子孫一體服用中貴李興為之左右綸憶其家忠孝集載先朝恩禮甚詳取閱無有與語塞陝西守臣以古璽進朝士將稱賀綸奏在德不在寶且辨其誣歷陞廣東參政湖廣右布政廣西左布政使所至皆著勳伐時逆瑾方牢籠天下士資淺者俱獲顯擢或勸其自結綸應曰三十年熬居忍改操耶萬一被螫角巾私第亦復何憾未幾瑾傳勅詰責奸黨與大學士劉健謝遷等五十三人俱勒致仕尋擢巡撫湖廣都御史聞父喪解職會仁化樂昌乳源連州盜犯柳桂甚熾有旨奪情起復便宜行事遂督兵分道進剿搗其巢穴擒斬千有餘人事竣終制以疾卒於吳門綸孝友天植剛方耿介不媚流俗務為身心經濟之學而以喜

寧波府誌

卷之五

人物

七

聞過罕言利為座右銘為文平實淡雅理明意遠尤精於醫守外任時常朝聽民訟暮療民疾歷著奇驗

魏英

字士華成化十七年進士由太常博士擢御史清

馬湖知府安鰲士人世其官專殺贖貨不可制朝廷常羈縻畜之及是稔惡拒命英設法擒滅奏改為流官沐川長官司悅氏女姪爭襲相賊殺奏許累年英一訊而決無不懾服再入臺以風力著命閱京營前此坐為權貴隱占者一糾以法出為湖廣副使永順保靖二宣慰分占峒寨英為理曲直畫疆界以息爭且俾之和親以固其好斬水知縣坐累下獄數年官司幸以嫌避莫為白英力辨直之進按察使與襄二府以莊田互持短長英悉為辦理他勘鞫各得其情壽府奏求湖田英以籍在民格勿與鎮守巨璫虐民復視以法使不得肆皆銜之幾陷不測而英屹不為動陞江西右布政寧府方恣橫欲盡私南昌所屬河泊湖鈔英拒之力竟莫能遂遷雲南左布政尋擢副都御史巡撫貴州會乖西苗阿雜為亂屠城堡懼王

號英調集土漢官軍申明約束分七哨以進四面夾  
攻破寨六百六十有三生擒阿雜俘斬二千招降以  
萬計所獲驢馬牛羊無算捷聞降勅獎勵會江津仁  
壽通賊方四任三及麻六兒等復熾攻破思南石阡  
二郡兵連偏衛諸鎮命英兼制湖北英部署諸軍以  
重兵屯境上分布精兵直搗其腹連戰破之斬任三  
得級千招撫萬七千餘餘賊遁去帝  
復降勅獎之以與部使不合乞骸歸

周旋

字克敬成化二十三年進士授南戶科給事中改  
北兵科時疆圉多故旋係上方畧威中機宜知州

劉遜為宗藩所陷言者皆繫獄旋上章申救釋之復  
奏開南旺舊湖漕河賴其利舊制各管俱有牧地為  
權貴侵奪幾盡旋奉勅查理中有入為皇庄者因疏  
言陛下天下主母后享天下奉何必私牧地頃畝之  
入而後給遂罷之在科九年多有建白出為廣東叅  
議平蘇孟劉之亂人稱其績旋性嗜學雖仕途倥偬  
手不釋卷慈故無志旋與邑人陸紳纂成之文獻藉  
以有徵紳字薦紳詹事中善孫長史珪子弘治二年

寧波府誌

卷之三

人物

六

舉人歷官楚雄同知以循吏稱旋長  
子士英正德九年進士官工部員外

王術

字用仁成化二十三年進士授嘉定知縣縣有積  
荒田千頃賦責辦於里甲民不勝其累術招撫流

移計口授畝復給之牛種民始復業捕盜卒以私怨  
誣鄉人為盜逮繫甚眾術疑之故緩其獄未幾真盜  
出瀕海介蟲為災術為文驅之患遂息巡按吳一貫  
書其考曰作令江南第一持身天下無雙擢監察御  
史劾壽寧侯張鶴齡飲酒不敬無人臣禮權  
貴為之震懾奉命查盤兩廣以勞瘁卒於官

馮厚

字良載少孤事母至孝博學善詩文成化中以明  
經徵授教職歷遷淮府長史子綱字尚堅以制貢

入太學亦由教職遷淮府審理為入方正有標準宸  
濠取淮府瑤琴鋼厲色曰宗器也安得與人己復請  
旂纛鋼聲色益厲王甚重之進階長史歸而讀書石  
刺峰之麓以理學課其子弟孫光浙曾孫柯皆守家  
庭舊聞不為異說所惑僉謂克世其  
學云光浙周府教授柯襄府教授

桂蓮

成化十五年貢生官巢縣訓導明倫堂後逼五顯祠巫覡鐘鼓朝夕喧闐連以妨於絃誦白郡毀之

知縣李進執不可連率諸生卒毀之為進所搆下獄以毒訊致死巢士子祀之學官又有劉銓向欽者亦以教職著銓字世衡弘治八年貢生先是同學生魏混將貢而罷次應銓銓陳其家貧親老甘讓混居其次督學高其義從之事母至孝官丹徒訓導時迎母官署母踰大壑銓亦近者艾矣朝夕服勞雖寒暑未嘗懈也母沒哀毀過禮兄性嚴急銓事之極恭宗人有將市其室於鄰者銓以已室易之後卒於海陽任所士子執喪哭奠如哭私親焉欽字德恭正德十年貢生幼嗜學以五經補弟子員家貧資修脯以養門人經其指授皆登科第而欽以貢授宜春訓導日進諸生辨論經史旁郡邑及從宦子弟皆來學貧不自存者欽捐修脯資之言及利未嘗不面頸發頰也遷新淦教諭時新淦析為峽江諸生在析中者皆願歸舊學其得士心如此

寧波府誌

卷之三

人物

九

秦碧

字仲文弘治二年舉人官饒州府通判會姚源賊屢叛未服都御史陳金倡招撫立縣之議檄碧經

理縣事時省吏皆賊耳目碧苦心調馭眾稍戢夜則與兵使李情巡視固守正德八年八月賊復叛攻陷萬年新縣殺情及縣佐指揮等官碧亦被執而死事聞詔立祠旌之按舊志無碧傳雍正八年據饒州府知照抄粘萬年縣志平姚源傳補入

王純

字希文弘治六年進士授大理評事歷寺正陞江

西僉事逆瑾憾純無所結納罰米幾千石問關稱貸於邊歷陞大理少卿山東歸善王犯法奉詔往鞫同事者欲張大其事純執不可惟坐首惡數人稱上意擢巡撫宣府密邇京師視諸鎮最為要衝至則請壯赤城之兵增龍門之戍帝皆嘉納之在邊多斬獲功嘗賜寶香賜豸服賜麒麟服子鎔字時化正德十二年進士授刑部主事巨闖犯大辟內批末減鎔抗疏執奏罰俸者再詔獄多濫鎔平反二十餘事遷員外郎郎中改南刑部繼改南兵部車駕司減乘傳十

之四五奏革內使進貢船五百艘歲省數千金又清諸衛草場進雲南兵備副使置竹谿堡築潛江堤立正學書院以造士尋引歸嘉靖三十五年倭寇擾縣義不徑竇蹈火焚死子兆中兆衡衛父俱燼焉知府錢煥亦同被難死又有錢鯨者以御史便道南還值倭臨紹興高埠猝與賊遇或告以舟尾可逸鯨叱曰吾憲臣義不受辱乃張燈衣緋危坐為賊刺刃死煥嘉靖八年進士鯨嘉靖二十六年進士

**向錦**

字申美弘治十二年進士授東流知縣遷鳳陽府同知歲大饑朝命侍郎王瓊發粟賑之瓊按籍給散惟土著得食流民多莩死錦請計口給食無問土著流民數萬人無一譁者瓊特疏薦之陞南禮部郎中出知廉州府安南黎飯因國亂脅居民百餘越屯廉界欽守以獲盜上巡按已論死矣錦鞠之皆老幼藍縷無兵仗請坐首惡越界罪餘釋不問御史怒誣奏錦受賂失出事雖白竟坐此免歸錦性廉介合浦產珠採取費鉅萬錦一無所私歸途囊橐蕭然邑人馮志迎謂曰真廉州太守也以所居讓二弟市葑田

**寧波府誌**

**卷之三**

人物

于

築室其上籬落不捍風雨日吟哦其中怡然安之

**馮志**

字行甫弘治十五年進士歷汝寧郡守大猾剽商貨窟穴藩府吏請徵其獄辭志不聽捕得痛治之藩府人莫敢誰何武宗南狩駐蹕無定所各郡皆儲上供物且賄前途諸嬖倖志備具簡而法亦無賂遺後車駕從揚州取道所省無算以剛直忤上官量移河東運使致仕歸志性清方不諧於俗市宅容身闢小齋焚香靜坐視世俗艷慕泊如也汝寧人有為浙直指者其父老屬之曰為我好酬馮大夫直指書招志志不往他日直指行部至慈卒登堂致父老意其得民如此

**顧英**

字順中弘治十五年進士知萬載縣大家多匿田英為清賦籍不貸豪右齊民輸賦如歸陟南御史條陳時宜四事疏舉致仕尚書林泮給諫劉蒞都指揮石璽保留尚書孫交傅珪皆一時賢者而英之賢名亦遂著遷湖廣僉事整飭武昌諸郡兵備時郴桂苗賊猖獗巡撫以英監軍督餉築堡等營英申明約

束躬督土漢將士連破潭源天堂諸寨生擒巨師董  
福全黃福安等斬獲三百有奇柳桂悉平疏請添設  
宜章樂昌守備為善後計部議報可陞四川建昌兵  
備副使建昌接連雅州僻在西徼前官鮮涖其地英  
宜諭國法以示威德土官致餽一切諭却之已而天  
全陸番招討使土官高文林楊文秀等占奪蘆山土  
田攻城焚掠英奉勅往勦不踰月元惡就擒詔賜褒  
賞嘉靖元年土孽楊世仁煽餘黨擾掠雅州尋討平  
之復疏請遷中左一所於長河隘口給建昌兵備關  
防事皆允行又念川南所轄延袤數百里而彈壓止  
一官疏請加設分巡道以便統禦會撫臣憾英不關  
白轉奏以飛語中之竟移疾歸英家居三十年冠履  
整肅性耽書弱冠  
至老無一日廢云

### 劉滂

字伯雨弘治十八年進士由禮部主事遷郎中以  
事見司禮監劉瑾長揖而已瑾怒曰何物司官倔  
強如是奉使寧藩知宸濠有異志嘗因宴諷切之後  
宸濠結尚書陸完求復護衛滂劾之至再宸濠必欲

## 寧波府志

### 卷之三

人物

三

得之輦載金銀藏優臧賢家徧賂諸權貴而自以與  
滂有舊厚遺之且動以危言滂即日令兵馬司捕居  
閒者及南昌破王守仁得宸濠遺籍於燼中條平生  
所怨以滂為首日劉滂這廝遺以金棋一副白金千  
兩不受可恨蓋其以事成甘心云遷尚寶卿擬擢巡  
撫會卒滂居儀曹十餘年鄰邑胡某服役中官賂之  
千金求為孝子滂笑曰豈有失身闖豎而得為孝乎  
峻卻之還家屢空晏如一日思食肉無錢市徘徊良  
久乃已及卒家  
人鬻書以為殮

### 沈光大

字體行正德六年進士授大理評事都督錢寧  
捕得白蓮教艾道清等百餘人誣以大逆獄成  
送大理覆讞光大歎曰吾敢殺人以媚權倖耶止坐  
以本律寧大脚之激武宗怒廷杖光大四十錮以鉏  
匣必欲致之死會同邑劉儀曹滂力為調護都御史  
章綬亦疏救乃削光大籍而百餘人並得全活寧謀  
即家起南大理評事歷知開封府有  
救荒功以母老乞歸民建祠祀之

沈教

字敬敷正德九年進士授豐城知縣以憂去改桐城桐故孔道值宸濠之變巨閩悍將駐兵江上供億無算教力為裁損民忘其勞建桐谿書院置學田造士擢御史巡按雲南會尋甸土酋安銓搆亂武定上舍鳳朝文應之六詔震動夙夜籌策數月不解帶卒以底定時在盛年鬚為之白累陟副都御史提督南京糧儲致仕

秦鉞

字懋公正德九年進士知湖廣攸縣循績著聞擢監察御史巡視兩淮漕政時兩淮餘鹽盡發延綏遼左充餉鉞上疏請申明舊制慎勿開中奏可勅餘鹽存畱納價輸部濟邊永著為令巡按江西尤慎刑辟稍涉矜疑必多方開釋之陞徐州兵備副使丁憂服闋補九江兵備陞山東參政按察使左右布政使會廟建方輿部議取給外省鉞念徵斂煩多恐傷民力盡收郡邑贖緩充其需擢副都御史巡撫江西以時相薦召入內臺不數月乞歸卒從叔吉從弟金與鉞同舉正德八年鄉試吉字敬夫謁選得萍鄉令以

寧波府誌

卷之三

人物

三

廉介自矢流寇犯境劫帑五千去父老者爭助之吉曰死寇死法等也敢煩父老却不受監司多方調護得免於罪奏最擢知濮州計典入京不攜一幣不謁一人左遷龍巖令致仕家居環堵蕭然與劉世龍馮志結社賦詩以清節相高金字懋南嘉靖二年進士授南刑部主事歷遷北禮部郎中嚴嵩為大宗伯金每事與抗靈國寺僧私請僧綱司印嵩已許矣金持不可大啣之出守吉安中以計典罷歸金留心桑梓利弊多所建白倭犯上海黃巖諸邑策慈必中倭議築城人莫之省後三年寇至受禍最酷始服其先見鉞子宗道嘉靖十二年進士累官廣西叅議金子文潛嘉靖三十四年舉人官德藩長史

徐錦

字章甫正德十六年進士授甌寧知縣以撫字著聞擢御史巡按廣西威名大振歷陞都御史巡撫順天先事慎防邊塵不驚引疾乞歸而卒

陳誌

字信卿由儒士中正德二年舉人授建德知縣以廉明聞遷鎮江府通判不數月乞歸終養薛應旂

高其節賦詩送之歸後家無餘貲奉親備極豐腆親歿廬墓終喪營生壙親墓側合兄弟三人為一域

桂伯諒

字守誠正德十四年舉人授龍泉知縣擢南刑部主事歷遷郎中出知銅仁府未滿乞休民泣

留不得相與立碑頌德諒少孤好學雖隆冬盛暑不懈既致仕杜門蕭然出已資復祖廟置贍田令族子弟讀書其中人稱節孝先生

葉本

字敦叔嘉靖四年薦於鄉授南樂令俗故輕生小忿輒雉經或自溺本嚴飭鄰里不救解者罪之俗

頓草屬大蝗率民廣捕以易粟蝗不為灾調知上蔡再補零都皆著清節遷太平同知有盜殺麥商汰其舟蕪人汪夏得而載之不勝拷誣服株連二十餘人一訊盡脫之真盜果出繁昌駱熹死其父挾以傾怨家本察其詐雪之擢南刑部員外郎尋歸宦

姚涑

字維東尚書鏤之子母夢五色鳥投懷而生狀貌奇偉資識過人舉於鄉屢不第益肆力學問嘉靖

寧波府誌

卷之三

人物

三

二年殿試第一授翰林修撰明年大禮議起涑爭之力帝怒杖於廷又議郊祀合祀不當輕易時爭傳誦其疏詔修明倫大典輔臣楊一清欲疏涑名懇辭不與章聖太后寢疾疏陳母子至情帝感動遣中使問歷官俸次輔臣希旨薦之涑謝曰使吾仗鼎司驟進生平盡矣僅循資轉官諭遷侍講學士會丁父艱哀毀卒涑務為經濟之學不拘拘文辭如邊防海運皆有定議時有翰林三長之目謂經學政事史才也嘗論學曰昔朱陸之辨虛心求是今之辨朱陸者私心求勝蓋指餘姚云從兄汀字維寧弘治十二年進士歷袁州知府亦以政績著

袁載

字安道嘉靖二年進士授汝上知縣調沂水臬司徵賄不得注計籍欲去之縣民趨京師舉旛部門

乞留令者數千人改南漳遷承天同知入為刑部員外郎出知肇慶府疊石濬溪黎民便之肇為兩粵孤道海舟番舶例入數千金悉除以益民地產硯石亦無所取或曰公不幾寶山空手平載曰吾守端而不

能名一不此足為寶也時尚書毛伯溫與咸寧侯仇鸞征安南往返皆出其地鸞次甚載於供帳外一無私餽轉副使備兵臨清先是中使以燒造窟穴州境吏多與之首尾載至絕不為通中使使使參隨道欵庭捷逐之不習軟媚上章乞罷而已帝置勿問調海南兼督學政為當事忤致政歸載性介潔歸家惟圖書四壁蕭然自樂母年九十四侍寢膳一如孺子時焉

陳文譽

字德卿嘉靖二年進士授刑部主事論囚南畿論如法遷員外郎中審錄江西多所平反大學士楊

一清被誣下法司覈治諸曹難之文譽厲色曰顧事實不實耳何愛於楊公何畏於內府事竟得理出知鎮江府杜請托輕徭役百姓晏然罷居林下清介不淪有同年為巡按令有司以坊價遺之辭曰吾為官一介不取乃取償於鄉人耶竟却之初文譽聘馮氏女女病父母欲為改娶文譽固辭曰古人有娶瞽女者况病乎卒娶之不數年妻卒文譽以有子終身不

寧波府誌

卷之二十一

人物

十四

娶其制行尤人所難云

葉照

字景暘嘉靖二年進士授石埭令調繁新建兩邑並以最聞擢御史巡按淮揚不事苛細風裁特峻

維揚高鳳奸賊不貲以事見逮中貴人群為貸死照一繩以法聞者膽落歷陞右副都御史巡撫鄖陽控壓三省鎮以廉靜念二親老遂乞歸蕭然故廬無異寒素他時所知客為諸子諷之照笑曰兒輩有何富者相而欲乃翁改節耶署其門曰兒輩自耕伊尹畝山人且種伯夷薇其雅操如此

王汾

字本源嘉靖四年舉人授歙縣教諭湖廣聘主考撤棘即登舟饋遺一無所受監臨為移文直指致

之陞南豐知縣監司待之倨詣郡乞休郡守王度強留之至覲朔遂稱病篤上官稔其廉直不加罷黜陞淮安通判奉檄掣鹽商人以千金進叱之行縣督稅縣吏進陋規汾拒不納既而令因賀歲入謁使吏撥案下汾閉門捕吏令急請罪汾笑曰吾忍汚君賣潔耶徐令吏持原物出未幾致仕歸



周南

字啟東中嘉靖四年鄉試授常州府判署宜興篆  
桃花港苦淤塞南盡地開運兩月成功又移魏村  
開於桃花港口以時蓄洩奉委督運條三議累數千  
言皆軍儲至計調判漳州計擒海賊張國平等復改  
判雲南楚雄以親老不忍遠去致仕弟名  
中嘉靖二十五年鄉試歷官運副有廉名

馮震

字孟元嘉靖五年進士授行人奉使過家適父病  
震躬侍湯藥朝夕不懈貌為骨立居喪哀毀踰節  
不出戶者三年服闋擢御史巡按湖廣風裁峻厲屬  
吏凜凜奉法監秋試得士為多以註誤被逮褫職家  
居閉門誦讀絕不干請  
當道人咸重其介節云

劉安

字汝勉嘉靖五年進士授南工部主事改河南道  
御史入臺甫一月疏陳補君德以圖治安畧曰人  
君貴明不貴察察非明也人君以察為明天下始多  
事矣今天子綜核於上百執事振刷於下積年蠹弊  
十去七八所少者元氣耳伏望陛下大包荒之量急  
根本之圖畧繁文而先急務簡細故以弘遠猷不以

寧波府誌

卷之五 人物

五

一人毀而違怒不以一人譽而違喜久任老成非懦  
與貪勿輕棄優容言官非佞與奸勿輕罪推之庶事  
莫不皆然則君臣上下一德一心人人各安其位各  
盡其才而太和之治可復矣帝閱疏大怒逮赴錦衣  
衛拷訊兵科給事中胡堯時救之并逮治獄具請堯  
時攸縣主簿安餘干典史築決堤數十丈人稱劉公  
堤再遷長沙同知平寧鄉寇有功賜金幣擢知鳳陽  
府治行卓異賜正三品服旋丁內艱歸安隔心慈湖  
之學府學透三關方是路功虧一篑未成山之句宦  
遊十四載家無長物布袍疏食處之怡然子志業嘉  
靖四十四年進士知臨清州座師高拱罷相經其地  
志業執禮甚恭及拱再相欲授以銓曹固辭人服其  
介累官江  
西副使

張謙

字子受嘉靖十一年進士授刑部主事昭聖太后  
弟張廷齡頗橫術上曹祖挾怨告廷齡不法事下  
詔獄武定侯郭勛又誣廷齡反事下舉朝震恐曹郎  
應勸者以計免謙慨然任勸中貴鮑忠密諭謙善淪

此獄否者禍且不測謙謝曰刑官治獄有國家三尺法在務當於法而後止利害非所計乃拷掠延齡迄無反狀帝大怒獄凡三上三得嚴譴竟執法不阿帝知不可奪僅坐延齡殺人罪杖謙三十謫揭陽典史是獄也微謙以死持之延齡必族太后幾始歷陞南刑部郎中出守大名賑荒恤刑銓部奏為循良第一遷福建副使設方畧生擒海寇二百有奇詔賜金幣尋陞廣西叅政率兵討七山羅旁徭賊計七山與羅旁昏齒決策先征七山而後及羅旁規畫進兵斬獲殆盡以讒構陞按察使致仕歸家談道著書清約不異諸生後學管志道屠隆稱其清白視躬至德表俗私謚貞範先生

**羅洪**

字思抑嘉靖七年舉人甲辰會試趙文華以郎官分校欲為之地洪毅然謝絕授宿州知州課農桑

興學校恤孤獎抑豪右期年大治會武弁白某橫里中洪廉得其狀捕置之法中輩語調鄧州以疾卒洪少孤事母至孝在宿時板輿迎養無異家庭及調鄧以道遠不能迎親時時念母不置疾篤猶遺書長子

寧波府誌

卷之三

人物

美

令善事祖母弗以我病聞老人聞者憐之子女學亦敦孝行孫應斗中萬曆十四年進士授工部主事監大工有羨金數千兩中貴欲分取之應斗持不可遂疏於朝神宗嘉其廉特賜金獎焉累遷郎中出知河南大名二府皆有清聲以疾告歸卒

**向洪邁**

字景臯嘉靖二十三年進士改蘇州教授學使者露章薦於朝冢宰與同鄉耳其名者求一見

不可得量移大理評事累遷廣西僉事徭獞出沒與吏民雜洪邁一以恩信撫之境內帖然再遷江西叅議以母老乞歸洪邁天才絕人甫龔卽編讀周禮左國漢唐諸大家文其毛詩義雄渾變化不名一體至今海內學士家無不知懷葛先生者子東萬曆五年進士授行人厯禮部郎中典試陝西手疏申明祖宗舊章四事推舉俗弊二十一事言多採用憫宗藩祿糧多弊條陳名封要例亦以繼母老求外轉遷江西驛傳副使卒於家薄田敗屋視其父無加焉

顧紳

字曰翔嘉靖十一年進士授都水主事父艱歸里起補武選轉員外郎擢河南按察僉事備兵徐穎

頌故盜藪往時盜發并捕其姻鄰民益去為盜紳弛其禁盜黨多解散捕豪民毛至剛置諸法一州稱快以兵部查黃失誤論判許州尋起懷慶兵備藩親王守道殺其兄直指欲從末滅紳按治如律直指撫他事劾之紳疏辨廷議黜直指而改紳僉閩臬尋丁繼母艱歸服闋補雲南一月遷福建叅議時倭寇猖獗所至屠燒城邑巡撫王恂以紳知兵薦特命分守福寧得軍法從事紳至則實倉儲繕器械為城守計寇從浙海抵一沙攻秦與紳命奇兵襲之斬首百餘明年復寇大金間喫紳授水寨將士方畧復大破之於海民稍安先是福寧城甚隘守城卒居中而民屢環列城外寇未至皆奔竄紳曰卒以衛民今反委民於寇即擴舊址三之一而徙居民城內版築甫畢賊二萬餘已薄城下時樓櫓未備紳命樹柵城上以布為裨睨躬巡其間賊發城外塚取棺蔽體鑿城紳命鎔鐵液沃之繼以汕葦著體皆糜爛復遣將黎某率師

寧波府誌

卷之三十一 人物

七

繞賊後而開城誘賊賊疑有伏遁走內外夾擊大破賊城下斬其渠帥復張兩翼逐之至崱山斬首三百級俘敵二百有奇餘黨遁入海者水師邀擊之無一脫賊相戒無敢犯福寧界當是時道路梗塞饋餉不至州屬無一官紳以一身保危城殲狂寇事聞世宗賜白金文綺勞之時俘獲中有難民斷髮者數百將士欲以獲俘冒功紳廉得其情人給一券歸之內浙人二百餘并給貲糧遣焉尋遷四川松潘兵備副使松潘古維州地叛服不常紳擒奸軍周尚文等十九人置諸法部內帖然以積苦兵間請致仕詔晉正三品歸里一年卒紳色溫氣和恂恂若儒生遇事則持法無假貸篤於古誼友人鄭朝濟父子死清平萬里歸其骨福清令李某繫獄死撫其遺女擇秀士嫁之公餘飭學宮課士以經術人懷其德多建祠祀之

陳茂義

字喻之嘉靖八年進士授南工部主事改北兵部定武侯郭勛總團營以手札取馬價二萬金

大司馬將與之茂義奮然曰此祖宗儲以備邊者御批且宜慎營札何為者臣不與朝論避之歷員外

郎中陞廣西叅議定盧仝之變毛伯溫征安南以督  
餉功賜金幣遷廣東兵備副使值黎會羅常那綱倡  
亂茂義設方畧擒其渠魁餘黨皆就招撫後膺金幣  
之賜再遷廣西叅政以母老乞歸弟茂禮字履卿生  
有異稟精於數學登嘉靖二十九年進士授工部主  
事督理漕河濟寧大水饑民狼籍道路茂禮出羨金  
市粟賑之給醫藥療其疫癘全活萬人江浙被倭用  
兵胡宗憲請叅其軍事寇屯桃花港忽旋風起茂禮  
卜南涯有伏令弓箭手叢射蘆葦中盡殪之一口無  
雲而雷預卜斬馘幾何獲賊艘幾何皆毫髮不爽他  
若乍浦沈庄之捷皆與有功而不求敘循資陞江西  
副使至卽擒鄱湖鉅盜威名大振會嚴嵩欲得清軍  
署爲私宅持不可一直指自交趾贖還亦不爲禮中  
辭嵩調廣東一夕夢羅浮三仙人邀與偕隱各賦詩  
一絕醒呼僕曰吾去矣遂卒年僅三十有三茂義子  
頤正嘉靖四十一年進士歷官貴州按察使平者繼  
榮之亂亦以勳伐著

劉士達

字伯鴻正統間名給事煒曾孫中嘉靖十一年  
進士授長樂知縣擢山東道御史巡按京畿以  
風裁著章聖皇太后梓宮祔陵擇臺臣扈蹕士達與  
焉至通州疏劾內宮閤綬錦衣指揮趙俊貪橫不法  
事得旨逮問閤寺肅然還朝條上覈吏治普文教紓  
民力三事皆報可又摘吏禮兵工四部積蠹疏於朝  
語侵太宰許讚朝議罪以排陷人臣謫臨淮知縣遷  
汝寧通判合州知州會讚入政府遂遷德藩長史致  
仕歸家無餘產所居不蔽風雨士論稱之曾孫勳崇  
正四年進士授江夏知縣以杖楚藩內官落職閣臣  
賀逢聖疏理之起知旌德縣  
行取江西道御史歸里卒

袁煒

字懋中嘉靖十六年鄉試第二明年會試第一殿  
試第三授編修進侍講久之簡直西苑撰清詞嚴  
稱旨二十五年特用堂南翰林院煒願以故官供奉  
帝大喜立擢侍講學士甫兩月下詔拜禮部右侍郎  
明年加太子賓客兼學士賜一品服三十九年復以  
供奉恩加俸二等俄遷右侍郎明年二月調吏部兼

官供奉如故踰月遷禮部尚書兼太子少保乃命入  
直煒自供奉以後六年中進官保尚書前未有也先  
是煒以二月朔日食上疏帝喜之遷尚書及七月朔又  
日食上疏帝益喜其冬遂命以戶部尚書兼武英殿  
大學士入閣典機務累加少傅兼太子太傅建極殿  
大學士疾篤請告歸道卒贈少師諡文榮煒才思敏  
捷帝中夜出片紙命撰青詞舉筆立成帝大喜悅以  
故急枋用之惟與徐階不相能故歿而得下諡然煒  
亦頗留心桑梓疾苦慈運糧故輸廣積倉航海險遠  
又諸倉場徭役之隸餘定者皆借派於慈自丙辰倭  
難始成城民力倍困邑人陳文誼走鬪下陳便民三  
事煒從中主之得就近改運廣安倉借派諸徭役各  
歸其縣留稅銀七千四百有奇募兵城  
守慈民蒙利里甲捐貲置田春秋祀焉

### 劉廷儀

字汝象嘉靖十七年進士授陵川知縣以治行  
徵拜湖廣道御史出按遼左值朝鮮當冊封往  
例以貴璫啣命廷儀謂非所以尊國體綏遠方請如  
琉球例簡文臣往朝議聽之遂著為令再按雲南沐

## 寧波府誌

### 卷之三

人物

五

氏謀奪嫡恐廷儀中梗所以居間者百方卒劾治如  
律還臺條上兵食四事皆報可二十九年都城被寇  
九門晝閉郭外民扶攜老弱避兵者門闔不得入哭  
聲震野廷儀請啟鑰納之全活以數萬計以強直由  
知青州府與監司許奏謫鹽運同知遷思南知府復  
忤上官罷職歸時二親尚無恙含菽飲水孝養備至  
事季父如父鄉黨爭訟有司不能決者廷儀數言立  
剖人服其公正子志登嘉靖甲子舉人曾孫成郊康  
熙時歲貢  
以文行稱

### 姚梧

字文陽嘉靖二十年進士授嘉魚知縣邑濱江多  
盜梧繕城練卒盜不敢入又捐俸築堤外捍江波  
內便行者民稱姚公堤匿工部主事監龍江權務羨  
餘分毫無染歷員外郎中遷四川按察僉事備兵敘  
瀘抵劉顯於戎伍中後為名將在任多斬獲功再遷  
福建參議為蜀撫私憾被劾歸篋中裝惟古書敝衣  
家居奉父母如孺慕時遺產  
讓諸二弟自課桑麻給食云

張堯年

字原果隱士鈇之孫嘉靖十四年進士知金壇縣以治行第一改給事中歷吏刑兵工四科遇事敢言如論勳臣郭勛輔臣嚴嵩司馬張瓚司空甘為霖尤著侃直二十一年奉命督戰紀功一洗購首

市功之弊馳奏安攘入策仲論督府總參諸臣玩寇狀悉逮繫抵法初嵩遣入諭意以奉常餌之堯年曰豈以美遷而為鷹犬耶嵩大憾之會御史何維栢劾嵩遺堯年書稱其先見嵩遂誣為黨下詔獄廷杖謫江西布政照磨屢遷河南副使時信陽州守熊某為嚴世蕃婦翁諸司咸署上考堯年獨揭其怙勢殘民嵩憾愈甚由是處之荒徼以參政分守蒼梧苗寇竊發勦治有功賜金綺擢雲南右布政使尋轉左黔國沐朝弼驕縱議欲藩臬二司陪祀家廟堯年以祖宗朝無此例昌言排之朝弼氣沮遂與嵩表裏中之致仕歸敝屋數椽杜門謝交居父母喪哀毀踰節及嵩敗公議賜環以疾不起子兆芳登隆慶元年鄉薦耿直有父風

寧波府誌

卷之三

人物

三

劉廷誥

字汝欽嘉靖十七年進士授開封府推官祥符有冤獄滯十年夢神語必劉推官至乃雪誥果

雪其冤擢工部主事遷員外郎中管理通州河道歸羨金三千兩於官出知袁州府嚴嵩當國其家人多恣橫不法誥收其桀榜笞之同榜生居要路請官地數十畝拓其私第持不可喉言路劾之改調南康新白鹿書院置田四千餘畝以養士陞福建副使累遷四川按察使巫山盜五十餘人故鹽徒也郡縣深文入之誥察其寃令縛盜自贖踰月果獲真盜五十餘人皆得生調廣東按察使陞本省右布政轉左粵例貢珠每驗時先私其美者誥命設絳紗囊庭矚之一無所染指以入闈勞瘁卒

秦鈞

字鳴和嘉靖二十九年進士授南太常博士故事有事太廟中貴人與太常卿並南面坐而博士侍

其旁鈞至見設席如故拂然去自是博士別宴他所著為令累遷南考功郎丁巳大察鈞持論侃侃與冢宰相堵柱冢宰大恚考績至北都所贄惟悅筵諸要人大笑却之十餘年不得調久之始出為山東兵備

副使以內艱歸時恒王雅重鈔每賜宴未嘗以幣交  
空是贐以硯不得已受之比啟匣則百金藉其下鈔  
驚并硯返焉服闋補湖廣辰沅兵備紅崖苗叛單車  
撫之苗盡降累遷陝西右布政江西左布政使帑藏  
出納屬郡佐廉能者署名封識未嘗一啟緘會巡撫  
創行錢法與議不合遂抗疏乞休時鈔已擬擢中丞  
矣直指及諸僚競挽之徑去不顧也鈔居官清絕一  
塵在南吏部十年至不能給餽粥嘗除夕覓百錢市  
薪不得笑曰元旦突無烟一歲中最為吉祥  
歸里環堵蕭然馮方伯叔吉為營室居之云

### 馮叔吉

字汝迪祖禾有隱德嘗授徒金華見故人有喪  
資斧者蹶躄道中命生徒改事之而自攜空橐

歸叔吉成嘉靖三十二年進士累官湖廣布政使先  
是長江多盜或揚帆白晝中叔吉備兵池州特創皖  
城荻港二水軍畫界為守萑苻遂息在楚藩時宗祿  
浩繁歲支苦不給叔吉曲為調劑不傷民力而奉宗  
藩如制未五十遽致仕子若呂萬歷十年舉人知東  
流縣若舒萬歷二十年進士官刑部主政曾孫崑崇

### 寧波府誌

### 卷之三

人物

三

正十六年進士官行人

### 劉志伊

字可任嘉靖三十五年進士授吉安推官以廉  
明稱召入為御史視長蘆鹽課時景藩之國嚴

嵩私人鄢懋卿以都御史總理天下鹽法所至繹騷  
志伊靜鎮之商民安堵再按山西未至出為湖廣僉  
事備兵沔陽築新堤三萬六千丈修舊堤三萬丈有  
奇開馬家臺淤河三十里歷福建叅議雲南副使發  
黔國公沐朝弼不法事峻拒土司之餽風紀肅然擢  
廣東叅政適倭寇雙魚與胡可懷合兵擒斬五百餘  
級又設伏半渡擊之殲其衆以捷聞改按察使督師  
征羅旁搗巢深入功最多晉湖廣左布政使時布衣  
何心隱上書諷張居正終喪直指希旨將陷之謂心  
隱本吉水梁汝魁志伊嘗司理吉安會以無行訊決  
冀得一言為證志伊曰某在吉未嘗訊梁汝魁脫有  
之安知其即何也直指語塞遷應天府尹歷南大理  
卿工部右侍郎致政歸志伊居官清慎在楚藩左轄  
時藏中得無籍計銀數百萬右轄某其姻家也徵劄

分之志伊曰此朝廷物當疏之朝以佐軍國用吾兩人何私焉未幾志伊遷京兆某兼左轄盡發之以歸蓋兩人志趣不同如此志伊自謝政家居絕跡公府亦不輕發一言所居廳事僅旋馬以清約終其身孫元之萬曆四十三年舉人博學工文振之見忠義傳

**馮成能**

字子經嘉靖三十八年進士授福州推官適叛

兵五千行劫成能扁舟抵寨諭以禍福即解散徵授刑科給事中歷兵工二科屢有參駁都城戒嚴條陳便宜四事帝即日允行主事海瑞言事切直廷杖下獄且論死成能與顏鯨昌言於朝曰諫臣不能言而部臣言之已可愧死奈何坐視主上殺直臣乎時相感其言瑞得不死其諫止鑄太和像停翔鳳殿工作尤關國體擢湖廣叅政時金崗土官單璧殺嫡奪印縱寇掠成能集兵夜搗之火其營遂擒元惡陞貴州按察使水西安酋相攻至噪入貴陽莫敢何問名而諭之即去遷四川布政使督撫會省吾奉命剿九絲賊與總兵劉顯等按兵不動成能請急賞其用

寧涉府誌

卷之五

人物

三

事者人人感奮夜破凌霄城遂協謀襲破九絲俘斬以萬計拓地千里建武寧城凱旋監省試以勞瘁卒於官成能所在歷盤鉅雖戎事倥偬而不輟講學其泣楚滇黔皆泐立書院集諸生講究一以慈湖為宗居家與副使顏鯨會講慈湖書院學者守其規條不廢子時俊萬曆二十九年進士官工部主事有文名

**孫光祖**

字子紹嘉靖三十八年進士授祁門知縣課最

陞兵部主事歷正副郎出知黃州府遷苑馬少卿歷陞至廣西左布政使致仕光祖居官清介操持始終一節林居結社談道年七十餘卒子徵宿萬曆十六年舉人官安仁知縣

**姜國華**

字邦實槐有長者行嘗得遺金於市須其人

還之一婦驚葛得偽金行哭求死槐易以已金而投偽者於水國華成嘉靖三十五年進士奔母喪歸越三年始殿試授工部主事督三殿工省度支萬計歷遷郎中分司張秋決河陞河南按察僉事移陝西叅議時礦盜充斥商洛間劫畧吏民為害逐捕不



能得國華指授方畧渠魁授首為忌者所中謫判常州稍遷南刑部郎陞廣東僉事歸前後治獄多平反尤潔已自持粵有土司為怨家中繫獄國華察其誣出之其人橐千金來謝却不受去而苗民思之為立却金亭萬曆十三年子應麟為戶科給事中抗疏爭鄭貴妃冊封事請早定國本搜神宗怒禍幾不測語傳至里中家人憂泣國華笑曰吾垂老不意兒曹能作此等事雖受竄殛不恨矣後應麟被謫移餘千令迎養三年乃卒弟國望邑諸生篤於孝友倭寇入慈母喪在殯國華方試南宮未歸國望伏棺號哭誓以身衛賊至棺前將舉火聞門外噪聲投火去如是者三卒免於難人稱孝感云

### 徐一忠

字良甫嘉靖四十一年進士授行人累遷刑部郎中恤刑陝西司寇誤決重囚下詔獄司官皆降謫一忠左遷建寧府通判歷陞汀州知府調漢陽致仕一忠好學工詩居官多惠政其祠廟在汀州者至今奉祀不絕

## 寧波府誌

### 卷之三十一 人物

三

### 向程

字宗洛幼穎慧薛應旂督學政於童子中獨奇之補諸生再越月舉鄉魁中嘉靖四十四年進士除閩令疆力精吏職能使宿猾膽落隆慶二年徵拜御史甫上即疏請遠女謁戒崇飲帝為動容出按遼陽遼諸將狃而驕程至皆凜凜奉約束盤山告警檄諸將殊死戰復大勝遠與朝鮮以鴨綠江為限御史行部至江介朝鮮王使陪臣致餼牽之享程曰人臣無境外交况外國君長乎謝不納冢宰楊某邑子官於遼怙勢而貪以計最奏程抗章白其狀冢宰引謝曰真御史矣還朝值神宗踐祚程上書數千言要在近君子遠小人毋殖貨財毋適聲色正蒙養以基聖功經筵進講拘文法意不得舒請復古坐講禮從容開導數名宰輔及文學侍從之臣入直便殿侍豫遊通上下之情周知四方艱難古今治亂得失識者以為名言已出按應天會江防弛大盜白晝斬關奪府藏金新安俗好勝善結納每有關閩畱都諸公卿居間吏持兩端莫能決程先以法繩當路私人之為郡別駕者右族為姦利收案致法中貴人豪長者為講終

無所聽貪吏望風解綬惡少年皆竄跡盜不入界畿輔為之一變以母老乞歸復起御史按湖廣治畧與應天同萬曆四年楚大比士張居正子應試不第大憾程居正在政府尚刑名取論決多寡為殿最而楚囚辟不及額坐奪俸出為江西副使卒於官

**姚孟賢**

字汝德隆慶二年進士知貴池縣為政務持大道民勒石紀其事遷潮州府同知巨寇林良寶縱橫海濱人莫敢捕孟賢躬親桴鼓卒搗其巢擒斬無算當道抑其功不上孟賢亦以不能承迎上官請告終養歸林居三十餘年卒子元凱字禪高亦敦孝友生母王邁危疾元凱禱神請減已算益親壽疾果瘳為諸生有盛名中天啟元年解元

**姚應龍**

字子翼諸生時以學行聞舉隆慶元年鄉試歷知溫州民漁於海者遭風漂至漳之銅山鎮將以獲盜報制府檄應龍覆按應龍力辨非盜給資糧引驗

**寧波府誌**

**卷之三**

人物

三

遣之發帑金儲海庾增築沿海諸衛所城堡修治戰艦以時簡閱而特嚴違禁之罪終應龍任無盜警漳人祀之名宦子之光字叔韜萬曆三十四年舉人授蘭州知州肅王建邸其地礦盜竄入王府官不敢捕之光以大義諫王王為悚聽遷工部郎中出知銅仁府以運糧援貴陽功遷驛傳副使再敘功改雲南兵巡道參政奉表入京卒

**張大器**

字尚通隆慶二年進士授工部屯田主事條積弊上諸司空核減無算出督荊州關稅課額增羨為展差限久之歷陞郎中出知成都府疏錢法清倉儲以失上官意降詔安知縣致任孫念仔崇正十

二年舉人念仲康熙十二年進士

**劉伯淵**

字靜之父世綸生有至性十三喪母毀瘠如成人事父備盡色養敬寡嫂如母人稱長者伯淵登隆慶五年進士知秦興縣有惠政陞工部主事遷員外再遷刑部郎中擢江西兵備副使地為閩楚要

衝山寇乘間竊發伯淵撫馭有方遠近倚以鎮定年五十謝病歸崇正十年壽百歲特晉太僕少卿遣御史賚詔存問越三年始卒明士大夫登百歲者閩知府林春澤及伯淵二人而已

**葛繼宋**

字汝述萬曆元年舉於鄉為澤州學正改建寧令清苦自勵每催科有奇羨悉貯公帑一無所

私高立七父子為仇家所殺歲久未決繼宋廉得之一訊而服人皆驚為神明久之遷大理評事御史曹學程以直言得罪既下法司復有肯移鎮撫獄繼宋與同官合章爭之得不移陞保寧知府卒於任妻子攜兩破麓歸不能營窀

窆迄今猶藁葬平原也

**陸大觀**

字汝化萬曆元年舉人授河源知縣下車即除礦寇之害繕城修學剪豪猾正田賦毀淫祠善

政累累三載擢永寧知州民建祠祀之會潞王之國特授府長史首陳十二事進規王為感動晚乞歸杜門掃迹以理學自任

寧波府誌

卷之三

人物

三

**袁茂英**

字君學副使載之孫萬曆十四年進士授行人

使權稅羊城私以書請立碑之堂上并笞以使移疾歸再起湖廣參政陞雲南按察使安會擁眾入城奪民間婦女城中競傳安會反官兵擒繫獄中其部落幸眾譟城下撫按議放還招撫茂英持不可曰彼以兵械入一當死使其部眾攻城二當死立杖殺之撫按失色茂英屹不為動第移檄郡縣嚴城守調兵餉為征勦計寇聞會長死且知有備各歸洞無敢反者陞布政使致仕家居二十年嘗築漁溪官路十餘里

鄉人德之

**岑應春**

字澤仁萬曆十四年進士授工部主事管山陵

辦磚若干輸至京所司覈中程始給直貽累無所告訴應春令給直始辦料給費始輸運又勾其為胥吏侵牟者宿弊頓清歷遷郎中出為山東參議再遷尚嵐兵備副使繕新障一百八十里邊人稱岑公堡未

幾罷歸

向萼輝

字汝相父稔隆慶元年舉人授建陽教諭遷繁昌令務滌煩苛與民休息改濮州學正郡長憾

一青衿欲中以法稔力爭之不得遂拂衣歸萼輝中萬歷十三年鄉舉知建平縣雪誣盜禁勾軍創義倉遷黌序三年民風丕變陞刑部主事有囚應辟萼輝廉得其寃狀為白大司寇司寇有難色萼輝力爭之得釋都御史徐必達曰吾今日服君之仁與直矣出知潯州府益廉潔自持有大盜當論死按司檄萼輝審決案已定吏得盜金冀緩其獄萼輝每舉筆向口濡毫吏遂於毫端置毒暴卒堂上得民立碑哀之

錢仲選

字仁仲與巫山令陳應式同師鄉先生顏鯨究心慈湖之學鯨稱應式剛毅仲選清粹皆吾門

可與立者也萬歷十六年同領鄉薦仲選以親老謁選為東平州學正丁艱補冀州遷樂平令慈湖故嘗宰樂平仲選奉其政教從事進父老訪利弊正戶籍以均賦定官解以息民又捐俸建廩倉輸糧充軍廩

寧波府誌

卷之三

人物

美

有羨米例歸上官仲選正色罷之竟以觸怒當事免歸家寔甚屢空不繼時時與學者講道湖濱闡明心學不愧師門云兄引選字選之萬歷十九年舉於鄉為公安令邑故窪澤割江為城每入夏江水泛漲民多避郭西之斗堤仲選審度形勢環江築堤兩浹歲而功成邑人立碑紀之稱曰錢公堤

陳應式

字一甫祖文譽為吏廉沒無餘資至式家徒四壁舉萬歷十六年鄉試署肅寧教諭久之遷巫

山知縣巫故入蜀孔道星輅絡繹夫役供帳甚艱式一切裁省有橫索者縛其奴置諸法自是入巫山界輒斂跡權稅中使議以鐵鎖橫江為網盡計式以身抗之議始寢奉命採巨木布衣芒屨窮搜梅子坡干丈巖諸處一隸負折脚鐺半餘脫粟隨之如期而辦播之役督餉綦江身先士卒拔蘿捫葛夜宿青磷白莽間餉至懽騰壁壘賊遂破初之官止攜一妻一女一蒼頭奴已妻亡蒼頭護其女扶柩南還式遂孑身署中出則鏡戶視事休衙呼老隸炊飯一盂而已竟以忤權貴左遷上官去巫士民創祠祀之舟發兩岸

哭聲震動崖谷式間道還走先入墓設明水之奠遂不測所往久之相傳武林逆旅中有髯丈夫攜一竹簾中寒疾卒親故疑而省之則應式果死矣為捐金殮葬焉應式同門生王應選字俊卿少負才名嘉靖中恩貢入都嚴嵩欲招致之應選傲然不往後舉萬曆二年進士廷對擢第三人授編修未幾卒

**王芮** 字啟霞父彥宦遊合浦卒於官芮垂髫迎柩積雪遷通州知州賦才敏練判決如流以疾告歸州人立碑頌德焉

**馮有經** 字正之父讚寓居順天中嘉靖四十三年舉人早卒母劉氏守節撫之登萬曆十七年進士選庶吉士授編修預修實錄兼起居注官遷中允充東官講官再遷諭德歷庶子兼侍讀請告歸有經少事母以孝聞至是奉父母柩南還營葬復疏母節於朝得建坊旌表遂不出以疾卒於家天啟初推光宗講讀舊恩特贈禮部侍郎賜祭葬蔭子視常例有加焉

寧波府誌

卷之三十一

人物

三

**馮烜**

字大廷生而穎異六歲就小學即露奇特顧不喜為場屋詭遇之文發所藏經史子集讀之二十九

始列諸生萬曆十三年鄉試主司服其策畱心國事舉第一中二十一年進士知奉新縣奉新在山中民歲苦饑士不知學烜修水利設常平預備二倉招流民開墾捐贖給之闢荒土萬餘畝置田學宮以贍貧士復立義塾四鄉教民子弟暇則單騎往課殿最陞兵部主事丁艱服闋補禮部遷員外郎中時部中題請具覆凡有關國體者疏稿皆出其手而其請明南北部落及催東宮擇吉開講等奏慮尤深遠出督福建學政改江西叅政分守九江時九江新設關朝命李奄董其稅橫斂苛征稅不及額烜說李奄輕稅額招商人過關三日得萬金其後淫雨決堤饑孳枕道富戶皆閉糴烜從督關假漁稅千金增價以糴富戶遂各出粟又念江右一省皆災非乞恩不能博濟乃擬疏請以厰稅十一萬賑饑力勸李奄上之詔允半復擬疏丐南昌潘奄奏請竟得報可烜周旋二奄之間皆以至誠相感故奄亦諒其無私樂為之用廬山

者江右水口也父老言自聚仙亭災而江右水患不止  
熒從其請為捐俸復之父老方塑熒像于亭上而  
是日卒

### 劉憲寵

字抑之萬曆二十年進士授吉安府推官陞工部主事遷禮部員外郎司冊庫往例藩府請名請封非入賄不為覆奏憲寵請於宗伯朝至夕具稿上夙弊頓清復力持代藩舍嫡立庶事聲望大著時神宗儲位久虛廷臣以國本建言者皆遭嚴譴一日傳旨冊立冠婚禮官急具儀上復留中諭更期舉朝洵洵莫知所措憲寵力請政府封還詔旨儲位遂定皇長孫生條上諸放欵請罷礦使減稅課皆關時政急務累遷光祿少卿請告歸光宗立起僕少遷右通政疏請停加派以甦民困再疏屯田鹽政大弊與魏忠賢忤力請致仕忠賢榜示東林奸黨憲寵與焉憲寵登朝四十餘年每有建白必依於名教一時正人多援以為重生平無他嗜好清修絕俗與寒素諸生無異崇正時贈工部侍郎

### 寧波府誌

#### 卷之三

人物

三

### 馮若愚

字明甫父季兆嘉靖四十三年舉人署鎮平論邑窮僻不知五經季兆口授毛詩講論娓娓士始有登賢書者遷工部司務中官子弟竄名將作冒廩餼季兆勾考一無所容兩官潞邸之役條上便宜省冗費數十萬大峪陵工與主管銳斃復歸金數萬於有司會權璫有以銓曹陷者季兆遂拂衣歸若愚成萬曆二十三年進士授工部主事審決江南有黠囚關通權貴若愚至立論殺之朝議處以銓曹為忌者所抑不果歷署員外郎中出知襄陽府先是礦稅議起貂璫啣命四出楚璫陳奉尤鷲橫自開府武昌而以原奏韋國賢充錦衣開府襄之樊城黨與分布駕言金銀氣發人塚墓或夜入民舍搜私藏襄民洵洵思亂嘯聚成七寨若愚抵任詢知歎曰不急為計安用太守為陰為部署一日急召教諭徐中節授之兵以計給國賢出盡縛稅署爪牙而自策單騎擄國賢國賢驚股戰挽徐教諭鬚至絕而左右無一應者遂縛置郡獄縱火焚其畫舫諸黨與之在他邑者亦一時盡縛自襄至武昌皆譁傳太守神人而七寨民

亦詣府門崩角慟哭願解刀劍歸隴畝奉聞恚甚飛  
章上變楚人邀其疏漢濱兩月不得達時稅使日有  
進奉至是兩月無疏神宗因撤奉回已復詔盡撤各  
道稅使天下翕然誦朝廷之明不知實若愚一擊使  
然也若愚亦坐是久不遷在襄久視官如家民亦視  
如父暇時搜訪古蹟濬習家池表謝希逸故巖九載  
考滿乃投劾歸光宗登極起南光祿少卿攝國子監  
又遷滁州太僕少卿奸民附會馬政與訟者一切禁  
絕與諸生講學陽明書院羣稱之曰馮先生不以官  
位拘也病作歸里卒贈太常卿賜祭若愚生平臨事  
剛果而接物平恕所至人懷其德必肖像以祀襄陽  
祠在峴山卽隋淚碑故處而滁人亦築祠醉翁亭之  
傍國學祠則與陳文  
定郭文毅稱三賢云

### 王猷

字在吾父汝商由明經司訓登封有救荒功猷登  
萬曆二十六年進士知漳浦縣浦山脈發自摩頂  
損於開鑿猷徵贖銀充費修築六載始竣權稅中使  
擬設雲霄鎮爲竭澤計猷條析利害以去就爭於上

## 寧波府誌

### 卷之五

人物

堯

官議遂寢妖僧從普白朝陽來夜置符人門戶輒見  
怪復自驚符治之猷廉得其奸立捕置諸法葺學宮  
社學以興文教建橋梁以濟往來善政累累行取工  
部主事去浦民肖像祀之歷知惠袁二府皆有清白  
聲子灝崇正十三年特  
奏名進士終梧州知府

### 揚汝昇

字伯晉萬曆二十五年舉人授贛縣令章木泛  
溢淹及城郭汝昇督民操舟登山避之全活萬

計水退復築堤以防後患顧民建祠祀之陞四川真  
安知州奢安二僎作亂遵義仁懷諸郡縣皆被蹂躪  
汝昇以捍城功加運同署州事秩滿陞夔州知府再  
叙功加一級以疾乞休歸汝昇精兵陣之學守真時  
嘗提兵抵梓潼擒賊渠帥威名大震居官尤持廉介  
一縣令以茗二器進置白金十二兩藉其下汝昇破  
器見金揮其茗并劾之自是屬吏無敢餽遺者歸里  
杜門著書體粥不給鄉黨無不稱其清云同時有周  
夢可者字行父亦萬曆二十五年舉人知合江縣奢  
僎之變鄰郡多殘破合紅勢危夢可竭力圍守遣人

從間道乞師省城擒賊將周鼎敘功陞興化府同知

### 韓孫愛

字君博萬曆二十九年進士改庶吉士充福王講官王為神宗愛子舉動多不遵禮制孫愛每

陳古今成敗廢興以諷王為感動賜賚有加晉檢討陞蘄州兵備副使釐剔奸弊案牘一清嚴飭武備屹

然為一方保障以疾乞歸子昌錫字公純崇正十六年進士

### 楊守勤

字克之祖孫仲嘉靖二年舉人知儀真縣清操凜然一勢端窘簿尉甚迫孫仲微言諷之輒解

去以忤臺使謝政歸父世思見隱逸傳守勤生而豪放不羈為文千言立就萬曆二十五年鄉試第三人

三十二年會試廷對俱第二授翰林修撰以母老陳情終養尋丁艱服闋遷中允典順天鄉試再遷諭德

充東宮講官進退嫻雅音吐宏暢遇古今善敗可備法戒者尤諄諄隨事進規光宗每為竣聽尋奉命冊

封晉藩事竣擢右庶子兼侍讀以疾卒熹宗時加恩光朝侍從舊臣贈少詹事與祭廢一子

## 寧波府誌

### 卷之三

人物

罕

### 馮任

字重夫萬曆三十五年進士知吳江縣邑素號難治積逋累歲不清任祛夙弊絕羨餘乃得及額遷

工部主事出知成都府以邊才陞莊浪副使轉廣東按察使改巡登萊道創修水城登人賴之晉湖廣右

布政使改左布政使守天津會鐵脛賊賈邦槐倡亂厲兵措餉不兩月而焚巢擒逆餘黨悉平復以邊才

擢副都御史巡撫永平及山海關設水師練火陣築南北翼兩城葺治城墻千有餘丈加二品服俸撫關

五載以積勞乞歸按任以廣東按察使改登萊道又陞湖廣左右布政復守天津應是兩次降朔傳中

既不載明而守天津亦不詳何官殊為闕畧舊本如此無可考証姑仍之

### 馮起綸

字仲亨萬曆四十七年進士授豐城令豐邑積逋二十餘萬起綸催科有方逋負漸清尤銳意

作人時督諸生校藝甲子秋試得雋倍於曩時距邑數里細彩灣有樟橫截河中歲壞舟無算起綸禱於

武當行祠閱數日雷電交作移置高岸其他政績尤著以治最陞南吏部主事尋改北禮部遷兵部武選



郎上疏陳入事皆軍國至計陞江西南昌兵備改督四川學政皆著賢聲豫蜀兩地建祠祀之

李一鵬

字冲舉父應辰隆慶五年進士授大名府推官能辨冤

獄臺使者每以他郡疑獄委之無不立剖擢御史首劾滇撫王沆開邊引寇出按長蘆鹽課清羨銀十萬有奇再按雲南捐餒金創築師宗維摩等城以防普寇會苗獠倡亂廷議出師勦之一鵬持不可單騎往撫衆皆驚曰是向劾王沆者真御史也吾儕藉公得生何敢逆命竟就撫自是滇境寧謐陞太僕少卿歷遷大理卿一鵬為應辰孽子其嫂性悍虐嘗欲置一鵬死一鵬亡匿餘姚孫同知家養之成立妻以女比登賢書嫂又赴京揭奏借端誣讒之終不可得其後一鵬貴顯而事兄嫂有加禮尤人情所難云

馮元颺

字爾賡若愚長子大司馬元颺之兄兄弟並有文譽萬曆四十六年同舉於鄉元颺登崇正元年

寧波府誌

卷之三十一

人物

聖

不得踞兩部之堂兩部臣亦不得參謁內臣犯交結之禁部臣錢糧有弊聽內臣糾劾不得越俎薦舉彝憲大恚而元颺右諫垣亦疏爭中官出鎮兄弟並與閹宦為難元颺遂請告歸尋起禮部主事遷員外郎中出為蘇松兵備叅議溫體仁當國唐世濟為都御史皆為程人其鄉人為盜太湖者倚之為窟穴元颺鈞捕一無所貸最後捕得其渠魁論殺之則世濟族子也尋遷福建提學副使未行吳中有數大獄未具巡撫張國維疏留之會太倉張溥張采與諸郡生徒倡為復社州人陸文聲以不得附怒走京師昌言攻擊蘇司李為巡按所劾素與二張不相能疑受意二張亦誣告溥等交結溫體仁為帝危言之帝下國維按其事國維以屬元颺元颺具疏力辨其誣帝怒謫元颺山東選判而東高士類亦因是保全焉十年冬濟寧被圍元颺攝兵備事以城守功遷天津兵備副使十四年十月擢僉都御史巡撫天津元颺既掌中樞帝倚毗甚重并厚其兄弟元颺臥疾帝為賜官參療之會元颺以病乞休元颺亦遂引疾歸未幾元

颺同月卒季弟元颺字沛祖以五經中  
崇正十六年進士死於海外年三十二

### 馮元颺

字爾崧天啟二年進士知粵揭陽以剪山海巨寇著名崇正初徵授戶科給事中疏爭中官出

鎮時元颺亦疏論中官張彝憲兄弟遂負直聲已復疏詆輔臣周延儒誤國被切責尋連疏論山東總督劉宇烈縱寇主撫禮部侍郎王應熊無大臣體宜罷又言詞臣姚希孟孤忠獨立不當奪講官科臣趙東曦正詞讜論不當奪言路禮部郎周鑣建言獲譴元颺上疏申救言一歲中湯開遠金星耀華允成黃道周輩皆以庶僚建言而居言路者無聞鑣又以言獲罪臣誠媿死請還鑣職罷臣官不納王應熊謀改吏部元颺復劾之嚴旨譴責尋乞假歸八年春還朝時皇陵毀廷臣多歸咎內閣而溫體仁王應熊以票擬自委元颺疏言政本大臣居實避名受功辭罪平時以宰相自居天下有事則曰昭代本無相吾曹止供票擬上委之聖裁下委之六部夫中外之責孰有大於票擬者有漢唐宰相之名而更代天言有國朝顧

### 寧波府誌

### 卷之三

人物

聖

問之榮而兼隆位號地親勢重言聽志行柄用專且重者莫如今日猶可謝天下責哉陵寢之變帝將大赦元颺請急復先後建言諸臣十年正月朔日食元颺復指斥內閣皆不納再遷刑科左給事中數言部囚多輕罪請寬宥帝採納之詔簡東官講官黃道周為首輔張至發所扼且疏詆之元颺言道周至清無徒忠足動人主惟不能得執政歡至發亦兩疏詆元颺並置不問元颺前後在諫垣近十年專以摘發奸相扶植正人為事由戶科給事中擢太常卿再遷南太僕卿通政使召拜兵部右侍郎轉左十六年五月代張國維為尚書帝倚毗甚常稱馮先生而不名八月稱病乞休疏止輒慰留賜瓜果食物遣醫診視元颺請益堅乃允其去歸里七月而卒元颺長於知人料事孫傳庭治兵關中貽書戒毋急戰後果以輕出覆軍其引疾去也猶薦李邦華史可法自代焉子愷愈字道濟由廩生蔭錦衣衛正千戶博學工詩文元颺少子愷章字佇相亦工詩

劉尹辰

字瑞庚萬曆四十年舉人署蘭谿教諭學租數百石自給朝夕外悉推以贍貧士陞電白知縣

俞咨龍

字納言天啟七年舉人署天台教諭與諸生綜核經史身為規範士始有登賢書者學宮圯首捐俸為倡令亦捐贖鍰佐之不半載落成陞招遠知縣兵燹後民多失所又苦旱咨龍為文檄城隍神跪赤日中雨立降一日沿海難民擁入縣城人情洶洶咨龍亟那庫銀千兩買米賑之上官怒其擅發不為奏免遂質借鬻產償焉監生李抱泰謀奪劉志雄產適抱泰弟為賊殺遂駕之志雄兄弟前令已成讞擬辟矣咨龍覆讞得其寃遂盡釋志雄兄弟五人而罪抱泰奉檄辦理軍器戰馬皆竭屢從事會與守道有御監視內監亦索賂不應遂以通糧誤餉劾士民詣撫按保留環泣於庭得保題復職歸里

寧波府誌

卷之三

人物

望

馮敬舒

字元衷曾祖嘉言親歿廬墓以隱遁終祖應奎有好義名父起元天啟時貢生廷試當得邑令不就敬舒登天啟五年進士授工部主事監三殿工魏忠賢使私人以銓曹啖之敬舒謝絕尋權稅荊州督通惠河張彝憲巡視通州敬舒不為禮彝憲誣劾之逮其書役掠治欲連及敬舒以臺省論救得免陞江西參政丁艱歸服闋補四川參政分巡川北流寇破漢中逼保寧敬舒督將士前後百餘戰所屬三十餘城無一失者以功遷陝西按察使再遷山西右布政丁艱歸敬舒守保寧時見賊勢猖獗嘗置七首衣帶間日脫有不幸惟以此報國耳晚歲遷居別墅放情詩酒以卒士論惜之

向北

字隣鄉崇正七年進士授南太常博士丁艱歸服闋補行人考選監察御史劉宗周以言事忤旨北抗疏申救不報選郎吳昌時與周延儒朋比為奸北發其奸利事愍帝親訊中左門夾昌時折脛遂斬於東市北聲震班行中尋巡視長蘆鹽政歸里灌園任春而卒

董允茂

字承初崇正十年進士授刑部主事諫兵部員外陞山東濟南道僉事兵燹後村落為墟土寇

竊發允茂勤撫兼行殘黎稍稍安集冢宰謝陞重其敏幹調天津督餉參議閱倉儲得餘米數千石悉貯以佐急需秋毫無所染指丁外艱歸未幾卒

國朝周會發

字世培參議旋之後旋子士贊孫夢得兩世俱以孝友稱會發中順治六年進士授

庶吉士改戶科給事中剛直敢言時大工興疏請停工作以節用度吳三桂入川擅威福委署州縣不一復疏劾之西征軍餉開銷不實疏陳冒濫之弊再陳戰船採木累民直聲大著改禮科用兵後各省多以災祲告會發疏有司之踏勘宜速開報之分數當清左都魏象樞嘗稱會發蹇蹇諤諤不媿言官會劉正宗入相復疏論之遂出為山東兗東道副使曹濮多盜會發開其自新就撫者二百餘人不悛者發兵勦之復斬數十人盜遂解散河流潰決民有流亡者會發勞來安集流民復業以忤當道被劾歸川陝用兵

寧波府誌

卷之三

人物

四

薦起軍前劾用謝不往同時馮僕王嗣臯錢茂秦皆順治六年進士僕超授惠潮兵巡道僉事隨大軍南征結營城外風餐露宿朝夕督餉練士以勞瘁卒嗣臯工詩古文兼通數學亦以隨征超授桂林知府大區蠻叛獲脅從百人將盡戮之請於帥府得釋以疾乞歸茂秦授延川知縣大軍征姜瓖飛輓芻粟艱苦倍嘗時年七十餘矣上官憐其耄而勤陞平陽府同知致仕至八十八乃卒蓋均有勞於國者

沈德金

字積公順治八年選貢生廷試授長蘆運判有惠政商民德之秩滿當遷詣神祠保留者千人

康熙十三年擢知陝之徽州時吳逆倡亂經畧莫某率師入蜀至寧羌而前鋒王輔臣與逆合殺經畧反戈相向徽距寧二百里經流寇殘破城中戶不滿三千德金自九月抵任值軍興日不暇給比聞輔臣反即命其子吉至畧陽偵探而身率僚佐登陴賊從間道猝至城遂陷是年十二月十一日也賊帥王和尚挾德金父子去至營中露刃索印德金以頸就刃曰寧殺我印不可得也時印藏吉腋下一帥出偽劄令

勸父降德金厲聲叱之奪賊刀欲自剄吉亦奪刀向賊羣賊縛其手從掖下解印去然是時賊方務招徠卒不殺錮之察院中已而賊拔營襲天水守者亦分攫民間雞豕遂乘間踰垣出積雪瀰漫途徑不辨板荆蒙棘抵一土堡州民避難者留之已復遷透明巖再遷七洞溝轉徙無常十五年僞將王屏藩招德金昭以漢中知府德金稱病篤卒不汗僞命至十八年冬命吉出覘賊勢遇副將岳鎮邦告以始末岳歎為純臣乃給引驗護歸德金為人溫良樂易如春風和氣至臨危蹈難百折不回其節概又如此寓秦六載流離困苦一寄之

詩歸里六年而卒

胡啟甲

字巖英順治十二年進士授西安府推官秦民

甲居心平恕訊讞得情亦不忍加鞭撻惟用一二溫語解之民化其德訟為頓衰西安所屬州縣三十有七餽遺一無所受亦無一物遺上官康熙二年關中淫雨經旬城垣官署民舍皆圯有壓死者督撫率屬

寧波府誌

卷之三

人物

巽

吏祈禱雨終不止制府素訟啟甲廉特屬禱之遂辭不獲夜登壇匍匐祈晴明晨旭日當空天宇無纖翳人皆驚以為神三載考滿督撫交薦會都下有嘽之者竟鑄一級去秦民遮道號哭擁馬首不得行歸途以二騾負敝氈敗書一小奚隨之所過皆歎其清有泣下者同時胡亦堂字質明與啟甲同舉順治八年鄉試歷知新昌臨川二縣陞戶部主事亦稱文學吏云

馮萼舒

字韡卿順治十五年進士授青州府推官清慎

執法剖決如流歲稔設法賑濟民賴以活以註誤歸起補黎平府推官苗民龍光壽為營弁誣構下獄萼舒視報文前後日月參差立訊出之守弁役民營私舍請於督撫嚴檄禁止都勻屯田歲久紛錯窮民以徵比死者累累萼舒區畫盡善民始得所水西兵譁掠安順婦女一一奪還之民遷江寧府理事同知攝郡篆官署失火延及圜囹萼舒悉縱囚於外火熄爭來就獄人以為德化所感松郡民有投匿名帖誣人叛逆者一訊即白其誣陞太平知府謝病歸子

佩實康熙二十一年進士歷官雲南提學僉事

邵于道

字岸公順治十五年進士授衡水知縣銜與濁漳滹沱合為一洪波洶湧漂沒田廬于道相水

勢高下刊木斲石築堤二百餘里水不為災擢工部主事督太和殿工以勤飭稱旋差督南旺河道暑月隄防漏泄日從事畚鍤間濬淤補罅以勞瘁卒官

王雅

字思繩順治十六年進士授南靖知縣以外艱歸服闋補吉水吉賦額舊分四則時值清丈當事者

欲改為一雅以吉田肥瘠不等按田科賦正得其平持不可卒從其議江右經兵燹後流亡未集部議墾荒多者卽予陞擢前令因捏報九百餘頃攤其賦於里甲民逃亡益衆又山民恃溪洞險惡率逋負成習雅至前令以革職督催者凡三輩雅痛陳其弊於撫軍得題請豁免又招徠其負固者屏耗羨平權量民輸賦如歸夙通甄清前三令皆脫然去而雅以才擢戶部主事尋改吏部驗封遷考功稽勳二司員外郎

軍波府誌

卷之三

人物

吳

再遷驗封郎中卒於官雅在銓以清慎稱

周近梁

字臯懷副使曾發第四子康熙三十年進士授陳畱知縣濱河多水患近梁請增築幫堤民免

墊溺邑舊例協濟河工柳條并運費皆出於民上議就近採買總河韙其議推之沿河諸州邑在任三年勸農桑興學校善政著於汴中行取禮部主事陞刑科給事中再遷掌印湖廣學臣某請童子試入賞補充近梁抗疏劾其不可事遂寢再劾臺臣請馬例頂捐之謬尋稽察錢局疏陳舊錢不可廢得報可近梁在垣久尤畱心刑獄每命盜揭帖至必推勘再三務得其情遇可疑則劄兩議上請批閱往往至夜分其詳慎如此以疾乞歸家居杜門讀書屏絕竿牘性喜為詩與同邑姜宸萼相劇切然不喜詞人標目務為聖賢根本之學弟嘉修字敏來邑廩生亦工詩古文

林鏞

字學海父朝忠慷慨重然諾有古節俠風鏞中康熙三十九年進士授宜君知縣邑經兵燹後編戶

不成一里而居南北孔道往來廚傳舊皆取之民鑛  
裁損再三困始甦舊每丁輸賦二兩有奇豪強多賄  
免適屆審丁精心勾考盡知民貧富及一家老幼成  
丁數以產與丁叅酌均其科則隱匿者輒摘示之皆  
相顧吐實創建學宮凡制所應有無不備復移文西  
安郡學徧考從祀姓名置主奉焉捕土豪高品置諸  
法會訊徧橋命案出寃民張甲等於死以終養歸連  
丁內外艱服闋人都久之補松江華亭時年已七十  
二矣地大政繁扼於上官不得行其志次年夏廣撫  
巡海將至捐貲飭館舍具芻秣遍修海濱諸墩臺營  
舍不堪勞瘁感疾卒鑛事親至孝承顏順志無纖毫  
違忤居喪飭斷酒肉哀毀過禮待三黨恩義周摯人  
多稱之

**陳吳嶽**

字大錫曾祖卜鄰篤學嗜古父朝舜有長者行

嘗授徒吳中沈姓適糧將鬻其女朝舜憐之舉  
館貲贈焉吳嶽中康熙三十九年進士授漢川知縣  
下車遇水災請發倉賑之全活無算邑濱江建治襄

寧波府誌

卷之三十一

人物

七

水漲則順流下趨決隄防壞廬舍不可勝計吳嶽相  
地形築堤捍水民無漂流之苦楚民譖詐好訟懲其  
刁悍者訟始衰暇時進諸生考課經義經  
指授多成名士行取授禮部主事卒於官